

NANOIDE SAN PABLO CORINTO IMÁCIMO ORÉCABE

Primera Carta del Apóstol San Pablo a los Corintios

Coríntomo ite Jesucrístomo ínotinomo Pablo cuete

1 ¹ Cue Páblodicue. Nñéfue llujállena Juzíñamui começi jítaina izói Jesucristo jónegamiedicue. Bie izói daina Jesucristo orécamiedicue. ² Cue, cai ama Sóstenes ðiga, Corinto jófuemo ite Juzíñamuimo gairífiredino uáidotícoco. Afe llezica bibe ómoimo cueticue. Omoimo Jesucrístomo dájena jaináinamona Juzíñamui iéðomoi. Juzíñamui íena omoi jáillena afémieoiri ómoína jírrite. Nágagobiaimo ite cai Ocuíraima Jesucristo mámecido jicáfiredino, daje izói Juzíñamui íeiena uáidogaiaioi. Afe Ocuíraima Jesucristo afémaci ie, daje izói cáíie. ³ Cai Moo Juzíñamui, cai Ocuíraima Jesucristo ðiga, íaillinoína ñue uái illífue ðibénemo ómoína jóneiteza. Daje izói afe íaillinoi ómoína ñue éziciiteza.

Jesucrístomona comuide caimare illafue

⁴ Nágaruí ómoiri Juzíñamuina iere figora daiífiredicue, mei Juzíñamui Jesucrístodo ñue caimare ómoína itátate. ⁵ Mei jii, Jesucrístomo dájena omoi jaináinamona, Juzíñamui nana ie cáimafuiaí ómoimo orede. Nana ie caimare úrillafue Juzíñamui ómoimo llote. Daje izói ie onóigafuiaína ómoína onótate. ⁶ Mei daií Juzíñamui Crístodo daina uai ja ómoimo bie nahífueña ite. ⁷ Bíemona cai Ocuíraima Jesucristo cíocaizaíbillíruimo nai dúciñena llezica, nana Juzíñamui lloga uaina ómoimo íteza; abi ðiné jíáie uaina jítaiñeitiomoíza. ⁸ Afémie ico íirairuimo ómoína náiretaite. Iemona

cai Ocuíraima billíruimo dúciille dino buna ninó fiénidifuenta ómoimo nitáñede. ⁹Juzíñamui uícodo ie dáinana jaca ñue ícoimo fuitáfiredede. Afe ñinofirega Juzíñamui ie jító Jesucristomo cai nabáirillena caina uáidote. Afe Jesucristo cai Ocuídimie.

Crístomo gairífredino dájena iñeno oni eneno coméciidiaioi

¹⁰Amatiai, omoi cacai. Cai Ocuíraima Jesucristo mámeceido izire ómoimo jicádicue. Dájena omoi jainairi. Daje izói eneno omoi bozietaiñeno iri. Mei jiáifodo jiáimana énenaruiñeno ñue dájena omoi iri. Daje izói dáafuemo comeci fácaitiomoiza, íemo daje izói dáafuemo omoi maméritiomoiza. ¹¹Cue ámatiai, bifue ómoina daidicue, mei Cloé comínimona dáarie cuemo llotáiioi, omoi cígiri jiáimana ruifíruillano oni enénorie itíaiioi, daí daidíaiioi. ¹²Bie izói cue cacánafuedo ómoina daífacade. Omoimona illa dígamíaii jiáifodo úritiomoi. Dáarie cue Pablo iédicue daide, jiáimaci cue Apolos iédicue daide, jiáimaci cue Pedro iédicue daide, jiáimaci cue Cristo iédicue daide. ¹³Mei íadi nana omoi Cristo abí izóidinodiomoi. ¿Meita afe Cristo abí énenorie fecaca? Daíñañede. ¿Meita Pablo omoi méifomo cruzmo coraica? Córaiñega. ¿Meita Pablo mámeceido omoi báutizagaomoi? Daíñañede. ¹⁴Cue mena come Crispo Gayo díga báutizadicue. Omoimona abí díne jiáimacina báutizañedicue. Aferi Juzíñamuina “Figora,” daidicue. ¹⁵Iemona ómoimona buna “Cue bie Pablo mámeceido báutizagacue,” daíñide. ¹⁶Iemo jíai daa Estéfnas comini báutizadicue, mei íadi cuemo úibicaiñedeza, abí díne jiáimacina báutizañedicue. ¹⁷Mei Cristo cuena “Comini o báutizari,” daíñede. Cuena “Cue ñuera jíllona uai o llócairi,” daide. Mei íadi cue abí ñinotade comini bacácido cuena llotáñañede, Cristo cruzmo tñillana cue ráifitañellena.

Cristo llogáfuemo Juzíñamui rñino ite naa ie baitácafuiairi

¹⁸Afe bie Cristo cruzmo tñillafue, nana nine táinomo báitino díbenemo ráifíñede taino uaillai izoide. Mei íadi ñue jíllotino díbenemo, Cristo cruzmo tñillado cai comeci illafue méidorede, mei afe uaimo Juzíñamui rñino íteza. ¹⁹Jaii Juzíñamui Cuegáuaido afémie bie izói daide:

—Iere baitáidino onóigafuiaina niné táinocaitaiticue.

Daje izói fibídino fibíllafuena ráifitañeíticue, —daide.

²⁰Ja bíniemo fibídímie ¿mei níifuemo cánoite? Comini comeci ífuena ñue méidoñede. Daje izói fia fibíllafue llófueraiima canóñede. Afe izói bínie ráfuii júfidotímie canóñede. Mei nana bíniemo fibíllafuii Juzíñamui ja jiáifodo méidoga. Ráifíñede taino uáillaina méidoga.

²¹Juzíñamui nana ie finóllifuiaina onófiredede. Iemona “Fia bínie comini báitajafuedo cuena ónoñeitiomoi,” afémie daíñocaide. Mei jiáifodo Juzíñamui íaioimo lloga uaillai íaioi ñinuado afémacina jíllotaacade, afe bie lloga uai jiáimacimo ráifíñede taino uai izoide íaioimo cfoacaide íadi.

²²Iemo Judúuai fia dáinamona comuide ciórainina ráaniaina cióacadiaioi. Iemo judíoñedino iere báitajafue jenódiaioi. ²³Mei cai, cruzmo coraica Cristo rafue jino llófredicai. Ie mei judúuai afefue llófuiana meáiruuitaioi. Iemo judíoñedino aféfuena “Ráifñede taino uailai,” daidiaioi. ²⁴Mei jiáifodo Juzíñamui jíllollena maiñócano dibénemo afe Cristo cairi tiilla llogáfuemo Juzíñamui rño ite. Daje izói afémaci éna afe llogáfuemo Juzíñamui baitaca uai ite. Daa Juzíñamui jíirigamie judío ímie íadi, bifue afémiemo ráifide. Daje izói Juzíñamui uáidogamie judíoñedimie íadi, bifue dájjerize íaillinoimo ráifide. ²⁵Mei jii Juzíñamui lloga uai, ráifñede taino uai izói comínimo cóide, mei íadi afe uai énie comini báitacafue baimo iere baitade. Daje izói Juzíñamui finócafue rñinonina izói comínimo cóide, mei íadi comini máirie baimo jamánomo riírede. ²⁶Amatai, mai Juzíñamui omoi jíirillafuemo uibóicairi. Omoimona báitádinona figo iñede, mei íadi nai ie comínidiomoi. Daje izói ómoimona ríllainina figo iñédeza. Iemo ómoimona jica jalleide comínina figo iñede, mei íadi nai Juzíñamui izíruigamacidiomoi. ²⁷Mei jiáifodo, bñie comini daina abina onóñedino Juzíñamui jae nizeca, ráfuiaina báitáдино méaicaillena. Daje izói bñie comini daina rñinidimaci Juzíñamui jae nizeca, nana “Mairídícue” daidino méaicaillena. ²⁸Iemo bñiemo ite jica jalléñedino naa jámairuigamací díga Juzíñamui jae nizede. Nana bie Juzíñamui nizécano jamai comini. Juzíñamui bie izói jamai comini nizede, abi íinota “Aillomiedícue” daidino rñinitallena. ²⁹Iemona buna Juzíñamui uícomo abina ínonide. ³⁰Mei dama Juzíñamui ómoína Cristo Jesumo dájena jaináitate. Daje izói Juzíñamui, Jesucristo cai ifoci déitatimiena jóonete. Iemo Crístodo, Juzíñamui anamo ñue jaícina cai íllena, afémie caimo jóonete. Afe llezica Juzíñamui íeiena Crístodo caina ñue finode. Afe bie Crístodo daí jíllodícai. ³¹Afémie daí finode, Juzíñamui Cuegáuai daina izói jaícina jino fuitállena. Afe uai daide: “Dámie abí ínoiacania, cai Ocuíraimado abí ínori,” daide.

Dama coraica Cristo rafue Pablo comínimo llote

2 ¹Bíru ómoímo cue llua izói, afe izói naui Juzíñamui ua rafue ómoímo cue lluaíbillaruido, cue baitaca féirede uaido ómoímo úriñedícue, “Íere ráfuiaina báitádimiedío” cuena omoi dáíñeillena. ²Mei naui omoi cígiri cue illa llezica daa Jesucristo ráfuena naa ie coráíafue díga, abi díne jíáífuena ómoína onótaacañedícue. ³Aféruillaído ómoíri rñinidímie izói itícue. Ie jira benena cue jácieri cuidíridícue. ⁴Omoímo jino cue llua llezica fia énie come baitaca uaido ómoína jíeruitañedícue. Mei jíáifodo Juzíñamui Ñuera Joréñodo jíeruitadícue. Daje izói Juzíñamuimo ite rñinodo: “Bífuena omoi jíeruirí,” daidícue. ⁵Daí ómoína daidícue omoi ínogafue, Juzíñamui rño dibénemo íllena; daje izói omoi ínogafue bñie comini onóigafuemo jáinaiñeillena.

Juzíñamui da ie Ñuera Joréñodo onoiga

⁶Mei íadi ómoimona Juzíñamuimo ñnogafuemo ñue móonaitinomo cue baitaca uaido úriticue. Bie cue baitaca uai bínie comini feñede. Daje izói bínie uñote ríllaini uáñede. Afémaci naa íaioi uáillairi niné cíocaiñeitiaioi. ⁷Jaiiai uáfodo ónoñega Juzíñamui fibíllafuiaido úriticai. Afémie jaiiai énie comuácana uícodo báinino maméřillafuedo úriticai. Aféruillaído caimo zíñona fuñeite jíllollifue caimo mamede. ⁸Nana bínie uñote ríllainimona bífuena buna onóñede. Bífuena onódiaioina cai ñuera Ocuíraima Jesucristona coráñediaioi. (Aféfuena íaioi onóñenado íena coráidiaioi.) ⁹Mei íadi Juzíñamui cáiena mamécáfue ie Cuegáuai daina izói ite. Afe uai daide:

Bínie comínimona jaca buna cíóñena ñuera raa Juzíñamui íena izíruitino íaioiena jóonete.

Afe izóidena comini jaca cacáñediaioi.

Daje izói áfemo jaca buna comeci facáñena.

¹⁰Afe bífuiaina Juzíñamui ie Ñuera Joréñodo caimo llotátate, mei afe Ñuera Joreño nana Juzíñamuimo ite uáfodo ónoñega ráfuiaina onóillena izire jicánofiredeza. Iemona afémie cai fidítate.

¹¹Bíniemo ite comínimona, ¿mei nímie jíáima comeci ífue onona? Dama afémiemo ite joreño ie comeci ífuena onona. Afe izói dama Juzíñamui Ñuera Joreño Juzíñamui comeci ífuena onona. ¹²Bínie comini fiñi coméçillafuiiai úicaiñegacai, mei íadi Juzíñamui caimo oreca Ñuera Joreño úicaigacai. Juzíñamui ie Ñuera Joreño caimo orede, aillo jeruñeno caimo ie fecaca ráfuiaina cai onóillena. ¹³Juzíñamui Ñuera Joreño caimo llófuega uáillaido afe bífuiaido ómoimo úriticai. Dani cai fibíllafuemono cai onoiga uáillaido ómoimo úriñedicai. Afe daíí Ñuera Joreño úicaiganomo Ñuera Joreño lloga ua ráfuiai jino ñue lloticai.

¹⁴Mei jíi, Juzíñamui Ñuera Joréñona úicaiñegamie afe Ñuera Joreño lloga ráfuiaina jeire oñede. Mei afémiemona bífuiai ráifiñede taino uaillai izóideza. Aféfuiai afémiemo jánaide, mei bífuiai cómemo dama Juzíñamui Ñuera Joréñodo llófuegaza. ¹⁵Mei íadi Juzíñamui Ñuera Joréñona igámie naga ráfuiaimona nifue ñuena, nifue fiénina daírede. Mei jíáifodo Ñuera Joréñona íñegamie afe izói daíñide. Iemona Ñuera Joréñona íñegamie Joréñona igámie jaca nífueña jicánonide. ¹⁶Mei Juzíñamui Cuegáuai daide: “¿Bu mei cai Ocuíraima comeci fácafueña onona? ¿Mei nímie Juzíñamuina llófuerena?” Mei íadi ie Ñuera Joréñodo Cristo ífoci úrillafue caimo ite.

Dájemo tájjidino izói Juzíñamui ocuica uai llujállena canódicai

3 ¹Amatai, bie lloga Cristo comeci fácafue nai ómoimo figo jóbiñede. Iemona Ñuera Joreño úicaigano izói nai ómoimo úrinidicue. Mei jíáifodo Ñuera Joréñomo nai figo jaináñedino izóidiomoi. Crístomo jaináidino dibénemo nai figo onóñede úruiai

izóidiomoi. ²Iemona nauí ómoimo féinino llófueticue. Nai monoi jirode úruiaí izóidiomoi; jáiaide güille nai ómoimo dúíñede. Iemo afe izói ñue baitácafue nai ómoimo jaca dúíñede. Nai aféfuena jeire ónidiomoi. ³Mei nai Ñuera Joréñomo jaináñena llezica jamai come izóidiomoiza. Nai birui jáimana úradoidiomoi, íemo icírafuena jenófirediomoi, íemo nai jáimana énenoruidiomoi. Iemona bíniemo ite Juzíñamui Joréñona nai íñegano izóidiomoi. Nana íaioi eneno bozíetaillafuina nai jeire otíomoi. ⁴Omoimona dáarie “Pablo iédicue,” daide. Jáímaci “Apolos iédicue,” daide. Bie izói omoi illa, nai bíniemo ite Juzíñamui Ñuera Joreño úicaiñega comini izóidiomoi.

⁵¿Mei níimie Páblona? ¿Mei jái níimie Apólona? Coco bie daa Juzíñamui ocuícamedicoco. Daa cócodo cai Ocuíraimamo ínotiomoi. Cai Ocuíraima cuemo jónega táijnamo táijidicue. Daje izói Apolos dama íemo jónegamo táijide. ⁶Cue bie fueñe ritímie izóidicue. Ie mei Apolos afe rigaji jáinoina riáitatimie izoide. Mei íadi afe rigaji zicótatimie daade Juzíñamui. ⁷Iemona cue bie ía ritímiedicue. Iemo Apolos ía riáitatimie. Bie coco jabóidimiedicoco. Mei íadi Juzíñamui jamánomoidimie, mei afémie afe rigaji zairítaiteza. ⁸Nana ido ritímie, afeji jáinoina riáitatimie nágaillinoi daje Juzíñamui ocuícámie íaillinoi. Mei íadi illa dígamie nano íe táijina díeze Juzíñamui íbaite. ⁹Coco bie dama Juzíñamui jetácamo dájemo táijidicoco. Ie mei omoi Juzíñamui riga jacafai izóidiomoi.

Nane jáie raa izóidiomoi. Juzíñamui como nicana uiga jofo izóidiomoi. ¹⁰Cue bie jofo níraini ocuídímiedicue. Juzíñamui cue ocuilla izói, bico jáillirai riire naidánetimie izóidicue. Iemo jáímie afe jáillirai acónimo ticáidimie izoide. Ie jira naga tícaitimie rairuédicue, fienu íe ticáñeno ñue íe ticáilleza. ¹¹Mei jii, abí diné jáímie riire naidaide jáilliraina naidáñenide. Afe íe riire naidánega jáillirai izóidimie Jesucristo. ¹²Mei naga come bie jáillirai caifófemo íe illónona nírede. Afe bíena daírede mei naga come illafue bie nillico izóideza. Dámie afe jáilliraina mameide Jesucristo caifófemo oro izóidedo íe illónona nírede, jáímie quenírede llojefe izóidedo íe illónona nírede, jáímie ráífide noficiai izóidedo íe illónona nírede, jáímie amena íedo íe illónona nírede, jáímie ía uifízaido íe illónona nírede, jáímie zicicai izóidedo íe illónona nírede. ¹³Iemo íco jáíruido Cristo comínimo itífue riire jicánuabilliruimo naga come íe nigano uáfori cíoite. Aféruido Juzíñamui cai táijina fácaite. Irai izóidedo naga come nigánuai Juzíñamui fácaite. ¹⁴Irai cúaritañega raado nitímie Juzíñamui íe táijina íbaja raana jiridoite. ¹⁵Mei jáífodo cúarirede raado nitímie minícana jiridoñeite. Nana íe táijina niné táinocaiteza; dama táinori llégiite. Mei íadi dama afémie jilloite. Ua, jofo bóoamona nana raaie uzilla mei, dama come jillona izói, afémie jilloite.

¹⁶¿Omoi bie Juzíñamui jofo izóidiomoi nai onóñediomoi? ¿Daje izói Juzíñamui Ñuera Joreño ómoimo íllana onóñediomoi? ¹⁷Afe bie

Juzíñamui ico íaifuenidico. Iemona ómoimona dámie bie Juzíñamui jofó eneno botáadi, afe cómena Juzíñamui jíái niné táinocaitaite. Omoí bie íaifuenidico izóidiomoi.

¹⁸Nane daa come dama abí jífueiza áfemona abí omoí rairuiri. Omoimona dámie “Bíníe ráfueña iere baitádimiedicue,” daiíadi, afémie meine abído íinoñedino daina izóí ráfueña baitáñedimiena jáirede, Juzíñamuimo ite nahí rafue baitállena. ¹⁹Mei bíníe comini baitácafuiái Juzíñamuimona ráífiñede taino uailíai. Ie Cuegáuai daide: “Iere baitádinona Juzíñamui dani íaiói bífueinamo írebaimo jíilla izóí jíítate.” ²⁰Nane dáanomo daide: “Baitáđino comeci fácafuiái ráífiñenana cai Ocuíraima onode.” ²¹Ie jira jíáimamo jaináillado jaca buna abina íinonide. Afe omoí dáamiemo jaináilla uai jíáifodo jóide. Nana omoí canóđino ómoimo jainaide. ²²Daa cómemo jainaiñeno nana bimaci ómoimo jainaide: Pedro, Apolos díga ómoimo jainaide, cue jíái Páblodícue ómoimo jaináidícue. Daje izóí nana bíníemo ite ráaniai Crístodo ómoiena Juzíñamui mamede. Daje izóí Crístodo Juzíñamui ómoína cáatate. Iemo omoí tíadi, Crístodo afe tíllana jácíruiñeitiomoi. Iemo biruíllaido Crístodo caimare írediomoi. Iemo uire jíáiruido ómoimo ífcaitífuemo Crístodo jácíruiñeitiomoi. Nana bie núefuiái ómoie. ²³Iemo Cristo íédiomoi, ie mei Cristo Juzíñamui ie.

Jesucristo orécano táijinafue

4 ¹Iemona Cristo canóđino omoí caina daiírediomoi. Daje izóí uáfodo ónoñega Juzíñamui lloga uailíai jino comínimo llófuetino omoí caina daiírediomoi. ²Mei jíi, táijinana jóonegamie ie ocuđímie íinofírenana afémíemo jino cótarede; ie ocuíllana ñue ícoimo fuitárede. ³Mei íadi cúemona, omoí cuemo ití fue jíacánodoiari járitañedicue. Daje izóí dáarie cuemo ití fue jíacánodoidino cuena dánana figo náfueñedicue. Afe izóí cue ití fue dama cue jíacánoiadi áferi járitañeiticue. ⁴Mei cue comeci úrilla nífuena cuemo nitáñede. Mei íadi afe izóí cue comeci úria, nai ua Juzíñamui eróicana ua nífuenidimiedio cuena daiíñede. Mei cuemo ití fue jíacánotímie dama Jesucrístoza. ⁵Mei jira, Cristo nai biñena llezica jíáima táijinafueña riire omoí jíacánodoiñeno iri. Daa cai Ocuíraima jíacánuaíbillíruí omoí ocuíriri. Aféruido afémie jíítí fomo báinino itínona bai úzefomo uáfori cótaitaite. Daje izóí aféruido cai Ocuíraima naga come comeci mamérrillafuiái uáfodo onótaite. Iemona Juzíñamui naga come nano ba íemo dúide díeze núefuiái íemo fécaite.

⁶Amatíai, mei ñue omoí íllena bífuiaido omoí o úritícue. Omoí canóđímie Apolos í fue dama cue fue díga jae ómoimo llotícue, omoí ñue dájena comécíillí fue uáfodo omoí onóíllena. Bí fue ómoimo llotícue ómoimo coco cótogafuiaido Juzíñamui Cuegáuai baímo omoí comécííñeíllena. Afe uai caina daide: Dámie díbénemo gáífiñeno omoí

iri. Daje izói jiáimiena jámairuñeno dájeze nana íaioimo omoi ínori. 7¿Mei nie come jiáimaci baimo ómoína ñue fínua? Nana omoi onoiga ñúefuiaí Juzíñamui fecácaza. Jaca Juzíñamui fecáñegana ñede. Iemona ¿nibái mei dáamiedo abina ínofirediomi? Abina ínofiredimie: “Cue comeci jítaina izói cuemo fecácaza,” daiífiredi. Mei íeñedeza. Omoi dani fécañegaza. Mei jira áfedo abina ínonidiomi. Nana caimo ite ráaniaimona dani cai ocuilla izói ñede. Nana Juzíñamui caimo fecaca.

8Biru ja “Nana Juzíñamui caimo fecácagafuiaí ja cai ógaza,” daií coméciidiomi. Nana omoi jitaica ráaniaí nibai ja omoi oga. Nana omoi onóacaga ífuiaina nibai ja ñue baitádiomi. Nibai ómoína cai canóñenado ja illáicomínina jáidiomi. Mei íadi táinodo abi ínotiomi. Iemo afe llezica cai bie jalléñedicaí. Mei íadi ómoína: “Ua illáicomínina omoi íi,” daidicue. Afe daií cai bie omoi diga dájena illáimaiticaí. 9Cai bie Cristo orécamiíai jino írainomo Juzíñamui fiécacaí. Cai bie lláviano títino izóidicaí. Jira cai bie nana énie nairai acárilla raa izóidinona jáidicaí. Iemona nana comíni naa Juzíñamui abi imáciri caimo éroitiaíoi, mei afémaci abi fáiacaitadinodicaíza. 10Cristo rafue cai llócaillamona caina jiáimaci “Abina onóñediomi,” daidíaíoi; mei afe llezica “Cristodo ráfuiaina baitáidinodicaí,” daidíomi. Omoi ríredinona illa llezica, cai bie ríñidinodicaí. Caina comíni jámairuilla llezica ómoína ñue jacíruitiaíoi. 11Mei jaiíai nai biruimo júbieri duere zefuídicaí. Daje izói cai jirole jainoi íñénari jiái duere zefuídicaí. Daje izói figo íncuironidicaí. Daje izói comíni caina fiéni finódiaíoi. Uái cai illino ñede. 12Aillo cai táijnamona iere llégidicaí. Iemo comíni cairi jainónaitimaci; mei íadi íaioína Juzíñamui canolle uaido fairíoticaí. Caina fiéni finóllena racádiaíoi; mei íadi ocuídicaí. 13Cairi fiénidífuedo úritiaíoi; mei íadi afe comínina comeci mánainafuedo ffaicana llófueticaí. Afe llezica oni dotaca íáirede raa dota izói, afe izói caina ráifíñedinona caina mámiano náfueñediaíoi. Nai biruimo cuidoda oni faíga íáirede raana caina mamédiaíoi.

14Bífuiaína omoi meáidaillena cueñédicue, mei jiáífodo omoi ñue íllena rairuíllano, lloticue, mei cúemona izíruiga jítótiaí izóidiomoíza. 15Mei cómemona facádonide Cristo ráfuenta llófuetino ómoimo ite íadi, nai omoi ínogafue tainédimie daade. Cristo Jesumo omoi ínollena, omoi moo izói omoi comuítatimiedicue, mei cai jíllona uaina ómoimo llotícueza. 16Ie jira ómoimo cue cíotaga cai ñue illífuedo omoi jáíllena, izire jicádicue. Daje izói cue llogáfuedo omoi jairi daidicue.

17Afedo omoi jáíllena, Crísumo cue ínotaga Timoteo ómoimo orédicue. Afémie cue izíruiga jító izóidimie. Afémie, Crísumo cue ínuamona cue lloga ñue cai illáfuenta ómoimo úbicaitaite. Afe bie afémie ómoimo llujíllifue izói, afe izói nágobiaímo ite Juzíñamuimo ínotimacimo, cue jiái llófufiredicue. 18Omoimona dáarie abina ínuano, daidíaíoi: “Pablo caina érozaiñeite,” daidíaíoi. (Afe izói dáinado cue

uaina uáitaacadiaioi.) ¹⁹Mei íadi cai Ocuíraima Jesucristo comeci jítaiadi raire omoi cue méiñuaillena ocuúridicue. Iemo cue billíruimo afe abina finotimaci nie núefue jiáimacimo finódiaioiza, afefue cue onóillena fácaiticue. Afedo íaioi ñuera ríno ite, nibai inédeza, ónoiticue. Aillo íaioi úrilla uaina náfueñeticue. ²⁰Mei jii, fia cai úrilla uaido, Juzíñamui illáimana illáruimo jaináitañegacai. Mei jiáifodo Juzíñamui Ñuera Joreño rímodo cai comeci itifue méiduano ie illáimana illáruimo jaináitagacai. ²¹¿Mei nie izói óiacadiomoi? ¿Mei nibai ómoína duere cue fínuaibillana óiacadiomoi? ¿Nibai izíruillafuedo comeci mánainafuedo ómoimo cue éroizaibillana óiacadiomoi?

Pablo fiénide meáifue finódimie duere finóllena llote

5 ¹Ja birui omoi cígimo ite iere fiénide jiruífueña comini cue fidítatiaioi. Omoimona dáamie ja ie moo ogango dama ie aina ote. Afefue iere jamánomo meáirede. Afe izoide fiénidifueña Juzíñamuina ónoñedimaci jaca rairuúdiaioi. ²Mei íadi bie izói ómoimo illa llezica inai omoi iere abina finofirediomoi! (Afe izói omoi illa iere figóñede.) Mei jiáifodo áferi iere zuure írediomoi. Daje izói áferi meáidarediomoi. Bie izói jiruífredimie omoi cígimona mai oni ore. ³Náamiéna omoi diga dama cue inédicue, mei íadi afefue dibénemo cue comeci facáoinana ñue onódiomoiza. Ie jira afe bie jiruífredimie ie duere finóllena jae cai Ocuíraima Jesucristo mámecido ocuúdicueza. ⁴Iemona Jesucristo mámecido dáanomo omoi gairízailla llezica, íemo cue comeci facáoinamo ñue omoi uibóicailla llezica, íemo jiái cai Ocuíraima Jesucristo omoi cígiri rínoarena llezica, ⁵mai afe ímana ómoimona jino dótano Taifena náamataga comínimo íena omoi zóoferi, ie abi fiéni jítainafuiai niné táinocaitallena. Afemona cai Ocuíraima Jesús billíruimo afémie joreño jíllobicaiteza.

⁶Afe íaifue nai ómoimo illa llezica omoi ñue íáininana illa izói abí finotiomoi. Afe abí ínuana figóñede. “Mei daa cómemo ite íaifue aillo ie abímo itímacina íáiretaiteza.” ¿Comini daina uaina onóñediomoi? Afe uai daide: “Pan finóadi afe aillo fáitate raa tamédiaioi. Due jiza fáitatena jónega íadi, nana afe magáfecina aillo fáitate.” Afe izói daa come finoca íaifue aillo ie abímo itímacina íaire finode. ⁷Iemona ómoína fiéni finode come ómoimona oni jica oreri, mei afémie jácaie pan fáitara izóidímieza. Ie jira afe fiénide meáifue ómoimona ñue muiñori, ñue jaícina íaifuenidímacina omoi íllena. Iemona fáitatena jóneñega comue pan izóidínona íitiomoi. Ja onódicueza, afe bie izóidíno ua itíomoi, mei Cristo nana cai ícoinia fagámiena jáideza. Afémie cai ifomo fatá Juzíñamuimo fecaca oveja jiza izóidímie, caimo ite íaifue oni dóllena. Afémie pascua rafue illa llezica cai uibóigamie. Ie jira bie íaifue oni omoi fáinocai; mei íaifuemona muiñócanona cai íllena, Cristo tíideza. ⁸Iemona nágarui cai

illáfuemo táinona úriñede comécido mai cai illi. Daje izói ñúefuiairede comécido mai cai illi. Afe izoide comeci fáitate raa jóoneñega comue pan izoide. Mei jiáifodo iáirede comécido cai íadi, daje izói éoicaide comécido cai íadi, afe izoide comeci jácaie pan fáitate raa izoide. Afe izói mai cai íneilli. ⁹Naui ómoimo cue cuezábemo ómoína daidicue: “Bie izói jiruúrede comínimo nabáiriñeno iri.” ¹⁰Bíniemo jaca jiruúredino ite, daje izói iere ráanaiacadino ite, íemo merírifiredino ite, íemo jánarai ióbitadino ite. Bimaci diga omoi nabáiriñeilla lloñédicue. Aféfuena rairuídicuena bíniemo oni jáirediomi. Mei íadi afe izói ocuñedicue. Mei íadi onódiomoiza, afémaci illa izói inidiomi. ¹¹Mei ómoína cue daíacanafue jiáifo jóide. “Cristomo ínote omoi ámadicue” daidímie íadi afémie jiruúreniadi, afémie diga nabáiriñeno iri. Daje izói afémie iere ráanaiacania afémie diga nabáiriñeno iri. Iemo dáamie jánarai ióbitaadi, íemo afémie jiáimana fieni úrifireia, ie jífaireia, íemo ie merírifireia, afe izoide “Cristomo ínote omoi ámadicue” daidímie diga nabáiriñeno iri. Iemo jiái bie izoide come diga omoi güiñeno iri. ^{12,13}Bíniemo ite ínoñede fiénidinomo itífue riire cue jicánolle cuemo dúñede. Mei íaioimo fieni itífuiái dama Juzínamui riire jicánoteza. Mei jiáifodo omoi dani ómoimo jaináidinona riire jicánorediomi. Ie jira afe bie fiénidifuiaredímie omoi cígimona oni oreri.

Juzínamuimo ínotino júfidogafuiái oni ínoñedinomo llujínide

6 ¹Dani ómoimona dámie jiáimamo júfidogafue comuíadi, ¿nibái mei oni jiáimacimo afefue záitallena jáidiomi? mei afémaci cai ínogafuemo jaináíñedimaci. Dani omoi cígiri ite Juzínamuimo dúidinomo jicárediomi, o júfidogana jaícina záitallena. ²¿Nai onóñediomi Juzínamui iédino nana bnie comini itífuenta riire jicánoitiaioi? Mei uire bnie comini riire jicánoitiomoiza, ¿nibái mei omoi cígiri ite dúefuiaina raire záitanidiomi? ³Iemo jiái, ¿nai onóñediomoiza Juzínamui abi imaci, ángeles dainámaci, itífuiaina riire jicánoitícaí? Mei uafue Juzínamui abi imaci itífuiaina riire jicánoitiomoiza, ómoimo ite bnie ífuiái raire záitallena ómoimona juánide. ⁴Bie cai illáfuemona comuide júfidogafuiái ómoimo comuíadi, ¿mei nibái mei Juzínamuimo gairídino dibénemo inédinomo llujífirediomi, afefue jaícina ómoimo finóllena? ⁵Bie izói ómoína daidicue omoi méaicailla. ¿Mei nibái omoi cígiri ámatiaimo comuídfuena jaícina fínuana baitádimie íñede? ⁶Ja birui da ama jiáimamo júfidogafue comuíadi, Juzínamuimo ínoñede jaícina finóraima uícomo llujífirediomi. ¿Meita bie izói írede? ¡Inide!

⁷Uáfodo onóigaza, nanómona daa júfidollífue omoi cígiri comuíadi, jiáie o ñue illáfuena táinomo fáifitaite. (Daje izói o júfidogafue Juzínamui ífuena jámairuitade.) Daa cáimona dámie fieni o finóadi, afe íba o óñeille baimo ñuera. Daje izói daa come cue raa jífuiano bairóadi afe meine cue

õneille iere baimo ñuera. ⁸Mei jiáifodo fiénidifue fáicanocaiñeno, dani omoi ámatiaimo fieni finódiomoi, íemo jiái omoi ámatiaina jífuiانو raana bairófirediomoi.

^{9,10}¿Nai onóñediomoiza? nana jiáimana fieni finódino Juzíñamui illáimana illíruimo dúciñeitiaioi. Omoi jífuefiñeno iri, mei naga fiénidino Juzíñamui illáimana illíruimo jáinañeitiaioiza. Daje izói áireiñeno jiáie ringo jetádino dúciñeitiaioi, íemo jánaraina íóbitadino, íemo jiruífuredino, íemo jiáie iima diga fieni itímiaí, íemo merírifiredino, íemo iere ráanaicadino, íemo jifáifiredino, íemo jiáimamo fieni úritino, íemo jífqueta bairófiredino; nana éniemo ite bie izoide comini Juzíñamui illáimana illíruimo dúciñeitiaioi. ¹¹Nai omoimona dáarie bie izoide. Mei íadi ja birui Jesucristo ñue iáinino finócaomoi. Daje izói Juzíñamui íeiena ñue mamécaomoi. Afe izói Moo Juzíñamui Ñuera Joréñodo, íemo jiái cai Ocuíraima Jesumo omoi íinuado Juzíñamui anamo ñue jaícina itábicaidomoi.

Cai abi Juzíñamui eróicana iere ñúeraza áfena íaidonidicai

¹²Comini daiífirediaioi, “Cue bie cue comeci jitailla izói íredicue.” Afe uafue, mei íadi naga íaioi comeci gáinafue íaioina ñue finóñede. Uáfueza daa come dama ie comeci jitailla izói írede, mei íadi afe comeci jitaíllafue íena anáfenotanide. ¹³Mei uáfueza: cai güille, cai jébegoi ie; daje izói cai jébegoi güille íena finoca. Mei íadi jiáíruido Juzíñamui nágaillinoi güille naa jébegoi diga jiáifodo méidoite. Mei íadi “Bie cai abina jiruífue íena mameca,” daiíñide, dáarie daií daiífirediaioi íadi imei afe uáfueñede! Bie cai abi cai Ocuíraima ie. Afe íbana cai Ocuíraima cai abimo dúide, cai ñue rairuíoicaillena. ¹⁴Iemo Juzíñamui cai Ocuíraima Jesús cáadimiena jáitate. Afe daií ie ífnua izói, afémie dama ie ríinodo cáadimacina caina mámeite.

¹⁵¿Onóñediomoiza ómoimona illa dígamie ie abi dama Cristo abimo dúide? ¿Meita Cristo abimo dúidimie jiruíredingomo dájena jóoneredicue? ¡Jaca jóonenide! ¹⁶¿Mei nibai jiáífue onóñediomoiza, dáamie jiruíredingo diga íadi afémie abi daa afengo abi izóicaide? Mei jii Juzíñamui Cugáuai áirenafue dibénemo bie izói daide: “Íima ie ai diga afe íaillinoi dámienna ja mameide.” ¹⁷Afe izói dáamie cai Ocuíraimamo dájena jaináíadi, afémie dájena joréñoredimiena jaide.

¹⁸Iemona mei jiruífuemona oni omoi iri. Nana jiáie cai finoca fiénidifue cai abina figo íáíñede, mei íadi áireiñeno jiáie ringo diga jiruífue cai finóadi, cai abina bácadicai. ¹⁹¿Mei onóñediomoiza, omoi abi Juzíñamui caimo iga ie Ñuera Joreño illano? Iemona afe Ñuera Joreño jaca omoi diga íteza. Omoi abi dani ómoieñedeza, Juzíñamui ie. ²⁰Mei omoi abi Juzíñamui jamánomo ráifidena íbácaza. Mei jira cai abido

Juzíñamuina ióbitaredicai, íemo jiái daje izói caimo ite joréñodo íena ióbitaredicai, mei afe bie cai abi naa cai joreño diga Juzíñamui íeza.

Pablo come áirenafue llófuete

7 ¹Ja omoi cuemo jicánoga uaillai afe ibádiuai llóiticue. Uáfueza dámie áireiacañenia dama illa figora. ²Mei íadi aillo jiruifue íteza, naga iima árede. Daje izói naga ringo inírede. ³Airedimie dama ie ai afémie diga íacana dieze, afémie írena. Iemo daje izói iníredingo ie ini afengo diga íacana dieze, afengo írena. ⁴Iníredingo “Cue abi daingo cuemo dúide,” daíñide. Afengo abi ie ini íeza. Daje izói áiredimie “Cue abi bie dama cuemo dúide,” daíñide. Ie aimo jaináideza. ⁵Iima ie ai diga íacania ráiruiñeno jíruiri. Daje izói ringo ini diga íacania ini ráiruiñeno jíruiri. Mei íadi níbai jíáiruido da come ie ai diga nano nígarui iere Juzíñamuimo íaillinoi comei facáacana llezica, aféruillaído dájena íñédiaillinoína ñuera. Afe mei nane raire meine dájena írediaillinoi. Mei are dájena íaillinoi jáicañenia, abi jítaínafuena ocuíninamona fiene íllena Taife íaillinona facáateza.

⁶Bífuiaí caimare ómoie íllena lloticue. Riire lletara uai daina izói lloñédicue. ⁷Cúemona nana comini cue áinino cue illa izói ítaíaióina, ñuera. Mei íadi Juzíñamui illa dígamiiaimo jíáifoide ocuilla ríno fecade. Dámie áinino dama illa ocufrede. Jáímie áinino dama illa ocuínide.

⁸Ja birui áinidinomo naa fecínguai diga úriticue. Damádimie dama cue illa izói ítaíaióina ñuera. ⁹Mei íadi dámie ie abi jítaínafuena ócuíñenia afémie raire árede. Daa come ie abi jítaínafue íena anáfenoa fiénide, íemona raire áirena ñuena.

¹⁰Mei íadi áiredino iníredino diga afémacina bie izói ocuídicue. Iníredingo ie inina jaca dotánide. Bie ocuilla uai dama cúeieñedeza, cai Ocuíraíma Cristo ie. ¹¹Mei íadi iníredingo ie ini dotáadi afengo daingo írede; mei jíáifodo afengo afe daí íacañenia, afengo meine ie ínimo abído bírede. Daje izói áiredimie ie aina jaca fáicanocainide.

¹²Iemo jíáífue díbéfodo cai Ocuíraíma úriñedeza, dama cue ñue fibíllafuemono úriticue. Daa Jesumo ínotimiemo nai íñoñede ai íadi, íemo afengo nai afémie diga íacana llezica, afémie afengo diga írede. Afémie afe ie aina dotánide. ¹³Daje izói daa Jesumo ínotingo ie ini nai Jesumo íñoñede íadi afémie afengo diga íacana llezica afengo afémie diga írede. Afengo afe ie inina dotánide. ¹⁴Mei jii, Jesumo íñoñede áiredimie Jesumo ínote aimo jaináíllamona Juzíñamui ñue ínócamiena jaide. Daje izói Jesumo íñoñede iníredingo ie Jesumo ínotimiemo jaináíllamona, Juzíñamui ñue ínócamiona jaide. Afe izói íñeniadi, omoi jíitítiai íñoñedino úruiai izói ítaíai. Mei íadi afe izói jóoiñede. Afémaci Juzíñamui ñue ínócaiaíoi. ¹⁵Mei íadi Jesumo íñoñedimie izire ie aina oni oréacania, dama daíítadeza; orérede. Daje izói Jesumo íñoñedingo

izire ie ini fáicanocaiacania, dama daiítadeza; fáicanocairede. Aféfuena júfidoñeno iri, mei Juzíñamui “Nágarui uái omoi ífireiri,” caina dáideza. Bie izói ífcaiadi Jesumo ínote ama naa ínote miringo diga rairuínino afe íñoñedimiemo jaináitanide. ¹⁶Mei íadi Jesumo ínote íniredingo cácarei. Nai ónoñegaza nibai odo o ini jílloite. Daje izói Jesumo ínotimie cácarei. Nai ónoñegaza nibai odo o ai jílloite.

¹⁷Iemona illa dígamie dama Juzíñamui íemo jóonia izói, afe izói nágaruillai írede. Iemo, fueñe Juzíñamuimo cai ínua llezica aféruimo cai táijina izói, afe izói nai birui táijiredicai. Bie izói nana Jesumo gairídinona ocuídícue. ¹⁸Dáamie Juzíñamuimo ínua llezica ie bacano ícoi quetátañenia, dama daiítadeza; quetátañeno iri. Daje izói jíámie Jesumo ínua llezica jaiái quetácaza dama daiítadeza; jíáfodo júfidoñeno iri. ¹⁹Dáamie ie bacano ícoi quetaca nibai quétañega áfena náfueñeno iri. Mei jíáfodo Juzíñamui comeí jítainafue jeire cai olle iere ráifina. ²⁰Illa dígamie fueñe Juzíñamuimo ie ínua llezica aféruimo ie illa izói, afe izói nai birui írede. ²¹Aféruimo jíáima jeruícamiéna o ia, áfemo járitañeno iri. Mei íadi afe ímmona oni o jáillino o báia, áfena maiñori. ²²Mei jíi, dáamie como fueñe Juzíñamuimo ie ínua llezica, aféruído afémie jíáima ocuífíregamie. Ja ie ínua mei Juzíñamui díbéfomo afémie bu ráiruínegamiéna jaide, cai Ocuíraima táijinafue ie finóllena. Mei daje izói jíámie como fueñe Juzíñamuimo ie ínua llezica, aféruído afémie bu ráiruínegamie. Ja ie ínua mei Cristo izire ocuífíregamiéna jaide. ²³Juzíñamui iere ráifidena íbácaomoíza. Iemona jíáima riire ocuífíregamiéna omoi íñeno iri. ²⁴Amatiai, omoi cácarei, ómoímona illa dígamie como fueñe Juzíñamuimo ie ínua llezica, nanómona ie táijina izói, Juzíñamui eróicana áfemo táijífireiri.

²⁵Mei birui nahí áinidino naa ínínidingotiai diga afémaci ífue llóitícue. Afémaci cue lletalle uaina cai Ocuíraima cuemo lloñede, mei íadi cue fibíllamona cue onoiga uai llóitícue. Mei Juzíñamui cue cánuado cue lloga uaina ínoredéza. ²⁶Mei birui iere jacírediruillaíza, cúemona bifue ñue cioide: daa come birui ie illa izói jíáfodo méidoñeno írede. ²⁷Mei birui ja áiredio, afe mei áinidimiéna abina maméñeno iri. Mei daje izói, birui nai áinidíza, mai ringona oñeno iri. ²⁸Mei íadi o áirenia, afefue fiénidífueñedeza. Daje izói daa jitaíngo ínirenia, fiénidífueñedeza. Mei íadi biruillaído naga áiredimie naa íniredíngotiai diga íaíoi illafue áinidimaci baímo iere juárede. Afe bie júaredífuiaímona ómoína rairuíacadícue.

²⁹Amatiai, ómoína cue daífacanafue bie izói jóide. Bníemo Juzíñamuina cai íóbitallíruí aréíñede. Ja benómona cai illífuena jíáfodo maméredicai. Birui áiredimie, áinidimie izói írede, raíre jíámíaci jacíredífuemona cánuaillena. ³⁰Daje izói come tíllamo zúunaitino birui zúnaiñedíno izói íredímoí. Daje izói caímare íráizizaidíno ja

birui caimátaiñedino izói írediomoi. Daje izói nana ráaniai íbáritino ja birui íaioi íbaca raana “Cáieiñede” daiífirediomoi. ³¹Iemo bínie ráaniai fecáfiredino, daje izói afe ráaniairi caimátaidino ja birui afe ráaniaimo figo járitainidiomoi. Mei bie cai ciona énie naa ie ráaniairi ja fúioicaideza.

³²Omoi gágudifuiaimona oni ómoína oíacadicue. Dáamie nai áinina llezica, cai Ocuíraima ífuiaimo járitairede, cai Ocuíraima íóballena. ³³Mei jíáifodo áredímie ie ai íóballena, bínie ráaniairi járitairede. Iemona afémie mena ocuídímie anamo ite izóidemoná, ie finóacagafuiaina finónide. ³⁴Ringóniaimo jíái daje izóidífue ite. Nai ínínidíngo cai Ocuíraima ífuiaimo járitaite. Afengo joreño naa ie abi diga Juzíñamui íena iere íacade. Mei íadi íniredíngo ie ini íóballena bie énie ráaniairi járitaide.

³⁵Ñue omoi íllena bífuiái ómoimo llóiticue. Omoi áireiacanafuena rairufacañedicue. Mei jíáifodo comini eróicana ñue jáicína omoi íllífuena jítaídícue. Iemo jíái cai Ocuíraima Jesús ocuícáfue jíziño jere omoi óllena, bífuiái ómoimo llóiticue.

³⁶Mei ómoimona daa come comécido daiía: “Cue jícánogango díbénedo ñue jáicína finóñedicue,” íemo afe llezica afengo are díno jítaíngoñeiteza, afémie comeci ñue faca izói, izire ie áireiacana izói áirede. Ie jícánogango ie olle fíénidífueñedeza, afe íaillínoí áirena rairuínide. ³⁷Mei íadi jíáimie jíáifodo comeci facáadi, mei afe ñuera. Ie jícánogangona ie aina ie oíacañenia daje izói afefue jíái ñuera; mei afémie ie jícánogango raire óñeíllena ie comeci ñue dáina izói, jica ía ñue mamédeza. Afe izóidífue íaífueñede. ³⁸Nana bíuailaímona bie izói onódicai. Jicánogango otímie ñúefue finode, íemo jícánogangona onédímie afe baimo ñúefue finode.

³⁹Íniredíngo, ie ini nai caana llezica, ie ínimo cuinaca izói jainaide. Mei íadi ja ie ini tílla mei, afengo bumó jaináíñede. Jesumo ínote afengo gágamiemo ínreirede. ⁴⁰Mei íadi cue comeci faca izói, afengo meine nane ínreíñedena baimo caimare íite. Bie uai ómoimo cue llua llezica, Juzíñamui Ñuera Joreño cuemo ite izoide daidícue.

Jánarai íena mameca rílleniai ífue San Pablo llote

8 ¹Ja birui omoi jícánoga jíáífue llóiticue. Jánarai íóballena ía íecaca rille ífue llóiticue. Iere uáfueza, bífuiaimo fíbídicaíza. Mei íadi cai onóigafuemoná cai abi fieni ínuana aillo comúitate. Mei jíáifodo jíáimana cai izíruíllafue nana comínina náirecaítade. ²“Baitádimiedícue” daidímie Juzíñamui ie onótaacanaze nai onóñede. Nai abina onóñede. ³Mei dáamie Juzíñamui izíruia, afe íbana Juzíñamui ñue afémiemo éroite.

⁴Mei ja birui jánarai íóballena ía íecaca rille ífue llóiticue. Omoimona dáarie bie izói daidíaioi: “Afe rílleniaína ríri” daidíaioi. Jíáimaci “Ríñoeno iri” daidíaioi. Fueñe bífuiaimo omoi cácarei. Mei

ñue onóigaza bie jánarai nahí ráañede, ráifiñede fia raaza. Daje izói ñue onóigaza jiáie Juzíñamui jaca iñede. Juzíñamui jaca daade. ⁵Mei comini, monamo aillo ite juzíñamuillai daiíadi, daje izói bíniemo jiái aillo juzíñamuillai ite íaioi daiíadi, íeñede. ⁶Mei íadi cáimona cai Moo Juzíñamui jaca daade. Afémie baímo jiái juzíñamui iñede. Uáfueza comini juzíñamuina mameca taino juzíñamuillai aillo ite. Daje izói íaioi mameca Juzíñamui jabóidillaini aillo ite. Mei íadi cai onoiga daade Moo Juzíñamui naga ráaniai finódimie. Iemo bie cai afémie íena iticai. Iemo jiái cai Ocuídímie daade; afémie Jesucrístona. Afémiedo naga raa comútaga. Cai jiái daje izói afémiedo comútagacai.

⁷Mei íadi nana comini nai bífuiaina onóñediaioi. Dáamierie nai jánaraina ióbitajana fibídiaioi. Afémacimona taino juzíñamuimo fecaca güllena, “Bie güille cai juzíñamuillai ie” comeci anado daídíaioi. Daií íaioi coméciilla mei áfena ritíai. Iemona afe taino juzíñamuillai güllendo íaioi ifoci úrillana bádadiaioi, mei íaioi ínogafuena nai figo baitáñediaioiza. ⁸Mei uáfueza, fia cai güígado Juzíñamui caímare caina uáidoñede. Cai güia, nibai cai güíñeniadi áfena Juzíñamui lloñede. Cai güíadi, afémie íena caina caímare íñoñeite. Daje izói güíñeíticai íadi, caina fiéni íñoñeite. ⁹Iemona ja onódicaiza rairuñeno güíredicai. Mei íadi áfemona abí omoi rairuíoicairi, mei dáarie íaioi ínogafuena nai figo baitáñediaioiza. Jánaraimo fecaca rille o ríana íaioi fidíadi, afémacina fiénidífue mo baiítatio. Afemona abí omoi rairuiri. ¹⁰Afe bie güille ráiruinegaza onódio. Iemona jánaraimo dúide güirácomo güizájidio. Afe llezica ínogafuena nai figo baitáñedímie o güíllana cióadi, afémie dáite: “Cue jiái cue güizájiticue,” dáite. Mei íadi afémie dibénemo, taino juzíñamuillaina jacíruillano afémacimo fecaca güille güite. Daií ie íllamona dama ie comeci úrilla bécade. ¹¹Iemona o ñue onóigafuedo, figo baitáñede o ama fiénidífue diné féiraitadio. Mei íadi Cristo jiái afémie jíllloillena tíide. Jira o afémie féiraitalle fiénide. ¹²Afe jira, ínogafuena nai figo baitáñedímie fiénidífue mo afémie o ífóadi, áfede Cristo fiéni finódio. ¹³Ie jira rille cue ria ícoínia cue ama fiénidífue mo cue baiítaiza, ja benómona jaca ríllena ríñeíticue. Daií cue illa jamánomo ñuera, afémie fiénidífue mo cue báítaañeillena.

Jesucristo orécamie buna ráiruinega

9 ¹Ñue onóigaza, nana jiáie Jesús jíainomo orécamíai izói, rairuínidícue. Mei cai Ocuíraíma Jesuna afémaci íena ciona izói, íena jiái ciódicue. Iemo jiái omoi dani Jesumo ínogano cai Ocuíraímamo cue táijinamona comuide. ²Jiáimaci, “Bie Pablo Jesús óreñegamie” nibai cuena dáitíai. Mei íadi afe izói cuena daíñidíomoi, ómoina cai Ocuíraímamo ja ínotadícueza. Iemona omoi dani Jesumo ínuamona, cuena bie uáfueza Jesús orécamie daítaite.

³Omoimona cue uáitatino uaina bie izói óiticue. ⁴Juzíñamuimo gairídino cuemo fecaca güille naa jirolle diga áfena cue llínolle bu cúemona rairuñede. ⁵Daje izói jítaidicuena jáie Jesús orécamié fínua izói, Jesumo ínotingona cue aina óredicue, cue diga jáicaillena. Iemo afengo jitaille güille daje izói ómoimona llínoredicue. ¿Ero ua? Ua, cai Ocuíraíma Jesús ámatiai naa Pedro diga, ringo ua izói, cue jái afe izói ringona óredicue. Iemona afengo ómoimona ecárede. ⁶¿Mei omoi nie izói comeci facádiomoi? ¿Nibai coco dáaillinoi cue nabai Bernabé diga, nanómona coco ónoido táijinafuenta fáicanocainidicoco, ñúefue coco llujállena? Mei feñedeza. ⁷Mei daje izói ¿nie fuiríraíma dama ie güille diga jáirena? Jáinide. Jaca afénomo ecácaza. ¿Nie come jíricona ríadi áfemona afe llizíllajina afémie riéñede? Jaca afe izóidimie iñede; jaca afémie aféjiaina riéfirede. ¿Mei nie ovéjaiai úiñotimie ie úiñoga oveja monoí omida afémie jiróñede? Jaca afémie áfeji jirófirede. ⁸Fia come daína izói bífuiai cue llua daií omoi comeciñeno iri, mei jaiai Moisés cai ocuilla uai daje izói dáideza. ⁹Afe ocuilla uai cuiánicomo daide: Arroz izoide trigo, juráreto gájirillena záizia llezica, áfemona íaioi güilleza fue maíñeno iri. Ñue onóigaza, bífuenta Juzíñamui dama juráreto jícana daiñedeza, ¹⁰mei jáíifodo biedo Juzíñamui cai llote. Bie ocuilla uai cai ñue íllena cuela. Mei jii, jacafai tíeraíma afénomona llizide raana otá güirede. Daje izói trigo gájirillena juráreto zaizítatimie áfemona otá güirede. Afemona afe íaillinoi güillena caímare ocufridiaillinoi. ¹¹Iemo ritímie rífirega izoide Juzíñamui uailai ómoímo fueñe lloticue. Ie mei birui ómoímo ite bínie ráaniai abido cue maíñolle figura. ¿Mei nibai ómoimona bie áillue izói cfoide? ¹²Mei jáie llófueraíni ómoimona íaioi güillena ófirediaioiza, ie mei bie cai afémaci baimo fia ecáregacai.

Mei íadi bie daína izói cai güillena ocuñedicai. Mei jáíifodo ómoímo ñúefue lluaíbiticue. Nana cue jitaiga ráaniai dama cue íbaca. Omoimona minícana fia onédicue, cue lloga Cristo daína uaina omoi ruifíruiza dai. ¹³Mei jii, jáífue ñue onódiomoiza, nana Juzíñamuimo gairíracomo táijífiredino afeco ie güilledo írediaioi. Bifue bie izói daiíacade; nana Juzíñamui íobitallena fecaca rille jobáiranomo táijífiredino, afénomo fecaca rillemona come jitáillaze otá rírediaioi. ¹⁴Mei birui cai Ocuíraíma daje izói ocuide. Nana jíllona uai llócaidino, íaioi llófuega comínimona güillena otá güirediaioi. ¹⁵Mei íadi cue bie daína izói jaca finóñedicue. Daje izói bie cue cuezábedo ómoimona minícana fia jicáñedicue. Güille ómoimona cue jicáñenamona júbieri tíidicuena, afe figo cuemo ráifñede. Raiñóñeno bie ñúefue cue llujáiri íere íobidicue. Afe bie cue íobillafue cue tilla baimo jamánomo ráifide.

¹⁶Jíllona uai cue llócaillado abina ínonidicue, mei afe llócaillena jóonegacueza. Bifue llócaíñedicuena inii duere cue zefuilla! ¹⁷Ie jira, dama cue comeci jitaille izói bífuenta cue llócaíadi, Juzíñamuimona

jirídoredicue. Mei íadi afe izóiñedeza. Juzíñamui cue níziano bie ñúefue cue llócaillena cue jóonete. Afena cue jaca jámairuinidicue. ¹⁸Iemona daií cue llócailla jirídua jáífodo jóide. Nie afe cue jirídogo daiítana fia cue ióbillafue; mei raiñóñeno bie ñúefue cue lluájillari iere ióbidicueza. Nana cuemo dúide tájijnana íbátañedicue. Uai llóraima izói cue tájijnamona, cuemo dúide ráaniai ómoimona raiñóñeno fia onédicue. Aferi iere ióbidicue.

¹⁹Mei comínimona buna ráiruñegacue, mei íadi nana comini ocuíllimiena abí mamédicue, baimo aillo comínina Crístomo cue jaináitallena. ²⁰Judíuai cígimo cue illa llezica, judío ímiena abido jáidicue, afémaci Crístomo cue jaináitallena. Bie izói daina, Moisés ocuica uai anamo itínona Crístomo cue jaináitallena, afe Moisés lloga uai anamo abí jóoneticue. Mei íadi uáfueña afe ocuica uaimo dúíñedicue. ²¹Iemo jáínomo, afe Moisés ocuica uai anamo íñédinona Crístomo cue jaináitallena, íaioi izóidimiena jáidicue. Mei íadi uáfueña Cristo uai anamo cue íllamona Juzíñamui uai anamo iticue. ²²Juzíñamuimo íinogafueña nai figo baitáñedino cígimo cue illa llezica, afémaci izói abí mamédicue, afémaci Crístomo íaioi íinogafue cue móonaitallena. Bie izói daina, nana comínimona illa dígamie íaioi illa izói íacadícue, mei níbai jáífodo íaioimona dáarie cue jíllotallena. ²³Nana bífuiaina íinóíredicue cai jíllona uai jica jalléillena. Daje izói bífuiaí íinódicue, ñuera cai jíllotate uai caimo onótaga núefuiaina cue maiñólleza.

²⁴Ja onódiomoiza, jáíamacimona aillo comini áizia, illa dígamie fia jirídogo raana onede. Dámie jirídote. Mai riire omoi aizi, jiríddolle raa omoi jiríddolleza. ²⁵Nana jífanuafuemo maméritino, jífanoiacana uícode abina náinitade raana ífmaidiaioi. Afémaci iere abina ífmaidiaioi, raire zábífirede raa íaioi jiríddollena. (Mei aféruillaído íaioi jirídogo rábiai finoina ífo icuífoi are íñeno raire etúdeza.) Mei íadi jáíamaciri fuíríenaila izói, riire nícidotícaí, jaca nínomo zábinide raa cai maiñólleza. ²⁶Cue díbenemona uínidímie izói ebena aizíñedicue. Iere níciduano, come jana fatímie izói táinona fañédicue, mei íadi comini ñue ínotallena riire nícidotícue. ²⁷Mei jáífodo abí ífmailla izói cue abina duere íinódicue. Daií abí cue rairuíllamona dama cue abina ñue jíeruitadicue. Bie izói íinóicaídícue, jáíamací cue llócailla mei, ruifíruillano Juzíñamui jino cue dótañeillena.

Jánaraimo caimátaííredino lleta uai

10 ¹Cue ámatiaí, bífuena ómoína fidítaacadícue. Nana cai jáíaidígima Juzíñamui jóonega mona uílliena eroide raa anado jáioicaídíaioi. Daje izói nana afémaci Jáírede Monáíllaina ruica jaitádiaioi. ²Daií íaioi jáíllamona afe mona uílliedo, daje izói monáíllaido dájena Moiséoiri jaináitagaiaioi. ³Daje izói nana afémaci Juzíñamui

monámona cocítaga güille güífirediaioi. ⁴Iemo nana afémaci afe Juzíñamui nofícimona totátaga jainoi jirófrediaioi. Mei íaioi jáioicailla llezica afe íaioi nabáioicaide jamánomo riírede nofici llócuva jiródiaioiza. Afe nofici daina Cristo. ⁵Mei íadi afémaci nabézie Juzíñamuina ióbitañede. Iemona zaféredizicimo tícoizitiaioi.

⁶Nana bífuiaí cai onóillena daií íficaide, afémaci gaiga fiénidífuiaina cai gáíñeillena. ⁷Afémacimona dámierie jánaraimo caimátailla izóí omoi caimátañeno iri. Juzíñamui Cuegáuai íaioi finócafuena bie izóí daide: “Afe comini fia ráinaillano güífirediaioi, jirófrediaioi. Afe mei náidacaillano rafue finoda záífrediaioi.” (Daií íaioi jánaraimo caimátaitiaioi.) ⁸Afémacimona dáarie jiruírena izóí, mai cai íñeilli. Daií íaioi jiruírenamona afémacimona daje monado veintitrés mil dígamie titácaiaioi. ⁹Afémacimona dáarie Juzíñamui afémacimo raire járitañenafuena náfueñeno, fieni íena facátataioi. Afemona díga comini Juzíñamui oreca jaio ainica íaioi tiilla. Mei jira, afémaci Juzíñamui fieni facátaja izóí mai íena cai fácatañeilli. ¹⁰Daje izóí Juzíñamuimo omoi ríriñeño iri. Mei afémacimona dáarie Juzíñamuimo ríriñillano úrioidino titade Juzíñamui abí ímie titácaiaioi.

¹¹Nana bífuiaí cai jáíaidígimamo íficaide, áfena cóillano comini bífuiaimona ñue abí cai rairuillena. Afe mei, cai onóillena Juzíñamui afe bífuiaí ie Cuegánicomo cuetátate, afe izóidífuiaimona cai bigímaiaí ñue abí cai rairuillena. Mei ja birui úrairuillaimo itícaiza. ¹²Mei áfemona, “Ñue ínotícue” daidímie daiítadífuemona ñue abí rairuiri, afémaci izóí cai báíñeillena. ¹³Omoimo comuide facátaina duere zefuállafuiaí, daje izóí nana jáíamacimo comuide, dani ómoiñedeza. Mei íadi Juzíñamui jaca ínofíregamie. Mei onódicaiza, Juzíñamui caimo ite máirie baímo, riírede facátafuedo caina fácatañeite. Mei jáíáfodo facátafue comuilla llezica Juzíñamui áfemona omoi jílloille iona ómoína onótaita. Afemona afe facátafuena ja ñue ocuirediomoi.

¹⁴Ie jira, cue izíruiga ámatiaí, jánaraimo caimátaillamona oni omoi jírecari. ¹⁵Ráfuena baitádinomo úrilla izóí ómoimo úritícue, íemo ómoína cue daiíllífue mo dani ñue comeci omoi facari. ¹⁶¡Cácare! Cai Ocuíraíma tíillamo cai úibicaillena, ñue finoca comunión illácurimona cai jiróadi, Cristo dñena dájena caimare mamécacai. Daje izóí afe illa dígamie mo fecaca comuníomo jáinaide pan, cai güíadi, Cristo abína dájena caimare mamécacai. ¹⁷Aillomaci cai íadi, daje pan cai güíllamona daade come abina iticai.

¹⁸Mai Israel nairai finoca ráfuiaímo comeci omoi facari. Juzíñamuimo fecaca rílleníai ritino, afe fecaca rílle mo dájena mamécaiaioi. ¹⁹Bie cue dáinamona jánarai ua raaza dáííacañedicue. Daje izóí, afe jánaraimo caimátaillena fecaca rille, jáíie rille baímo ráífideza dáííacañedicue. ²⁰Cue daina bie izoide: Juzíñamuina onóñedino fia iga raa afe jánaraimo

íaioi feca llezica, afémaci Juzíñamuimo fecáñediaioi; mei fiénide jóriaimo fecádiaioiza. Afe fiénide joría anamo dájena caimare omoi itábicairi, daiñedicue. (Daiñademoná ómoína rairuácadicue.) ²¹Fiénide joría ichécoimona omoi júrua llezica cai Ocuíraima ichécoimona jirónidiomoi. Daje izói fiénide jóriaimo mameca ríllenai omoi ria llezica, cai Ocuíraima mameca comunióna güinidiomoi. ²²¿Meita cai Ocuíraimana rícaitaacadiomoi? Jaca daií íacañedicai. ¿Meita cai Ocuíraima baimo rírediomoi, afémie duere omoi fíñoñellena? Jaca daií ríinidicai.

**Crístomona comuide conímána cai izíruillafue
cai rairuíninafue baimo ñuera**

²³Uáfúena daina. Dámie ie comeci jítaina izói fínuana rairuínide. Mei íadi afe izói illa cómena canóñede. Mei uafue, dámie ie comeci jítaina izói írede, mei íadi afe ie comécina mánaítallena ñue canóñede. ²⁴Dani omoi ñue illifue jenóñeno, jíáimaci ñue illifue jenórediomoi.

²⁵Fecáriracomo nana fecaca güílleniai jíáifodo o ifoci úrillado jícanoñeno uái daií omoi güiri. ²⁶Mei nana bínie Juzíñamuimo dúideza naa áfemo ite rílleniai.

²⁷Mei jíáiruideo Juzíñamuimo fíñoñedimie ona: “Güizaíbi” daiíadi, jaillano jíáifodo ifoci úrillado jícanoñeno nana o ie écajana uái daií güiri. ²⁸Mei íadi dáamie: “Bie lléciai jae jánaraímo fecácaza,” ona daiíadi, áfena riñeno iri; daií daidímie comeci fiéni o fíñoiza. Daje izói afémie ifoci úrilla o úaitañelleza. ²⁹O ifoci úrillana lloñedicueza, afémie ifoci úrilla o zánoñeillena, daií daidicue.

Mei nibai dáamie jícanoite: “¿Níbái mei jíáie come ifoci úrillado rairuécacue? ³⁰Nana cue güígari Juzíñamuína: Figora cue daiía, nibái mei jíáima cue güíllari fiéni úrite,” daií afémie dáiiite. ³¹Iemona bizóidífue ñuera: Omoi güilla llezica, omoi júrua llezica, nana omoi jetáacaigafue jeta llezica, mai nana afe omoi finóacaigafuíaína Juzíñamui ióbillena finori. Afe daií aillo ñúefue femo nítaitiomoi. ³²Ninó jíáimana oni nibéfodo fiénidífue o illáfuedo baiítañeno iri. Ua, judíuaina baiítañeno iri, daje izói judíoñedinona baiítañeno iri. Iemo Juzíñamuimo fínotinona baiítañeno iri. ³³Cue dibénemona, nana comínina nana cue finócafuíaído ióbítaacadicue. Dama cue ñue illifue jenóñedicue, mei jíáifodo nana jíáimaci ñue illifue jenódicue, ñue íaioi jíilloillena.

11 ¹Cristo ciótaga ñúefuedo cue jailla izói, ómoímo cue ciótaga ñue illáfuedo omoi jairi.

**Juzíñamuimo cai caimátaífirena llezica,
ringóniai jaca jíáimacina lletánidiaioi**

²Cue ámatiaí, ómoímo ñúefue nítaiticue mei cuemo uibíoífrediomoi. Daje izói omoi cue llófuiana jeire uano áfedo jáifirediomoi. ³Mei íadi

ja birui jiáifuena omoi onótaacadícue. Bifue bie izoide. Cristo nana íññiai ifoci izói Ocuídimie. Iemo nana ringo ie ini ocuica; afémie afengo ifódomie. Afe izói Juzíñamui Cristo ifode. ⁴Iemona dáamie Juzíñamuimo úrilla llezica, ie ifoci ibaia, afe ie ifócina meaire finode, mei ifoci ibailla jiáie come ocuilla anamo íllana llóteza. Daje izói Juzíñamuimona onoiga uai afémie llua llezica, ifoci ibailla ie ifócina meaire finode. ⁵Mei jiáífodo, daa ringo Juzíñamuimo úrilla llezica, íemo Juzíñamuimona onoiga uai llua llezica, afengo ie ifoci íbáiñenia, afe afengo ifócina meaire finode. Afe íbáiñena afengo ifo itirai nana cuidoca izoide. ⁶Daa ringo ifoci íbaicañeniadi mei dáaruído nácina cuidórede. Mei nácina cúdocana, ifoci íbáiñena daje izói meáirede. Mei íadi ringo ie ifoci naado cúduana meáiruadi, afengo ifoci íbáirede. ⁷Híñiai íaiói ifócina íbáinidiaíoi, mei íima Juzíñamui jánana eróideza. Daje izói íima Juzíñamui ñue ocuilla rínona jino cíotatímieza. Mei íadi ringo íima ñue ocuilla rínona jino cíotaite. Uáfueza, Juzíñamui íññiai anamo íñena izói, afe izói íññiai ringóniai anamo íñede. ⁸Mei íima Juzíñamui fínua llezica, ringómona finóñedeza. Mei jiáífodo ringo ímamona finócaza. ⁹Íima jitailla jira ringo finoca; mei íadi ringo jitailla jira íima finóñega. ¹⁰Afe jira ringóniai ifócina íbáirede, afengo ie ini ñue ocuícana anamo illa daííllena. Daí írediaíoi mei Juzíñamui abí imaci erócana itfaíoi. ¹¹Mei íadi Crístomo cai jainaina díno íima ringónino ínide. Daje izói ringo ímanino ínide. ¹²Mei uáfueza ringo ímamona finoca, daje izói uáfueza naga íññiai ringo jéiciga. Iemo nana Juzíñamui comuítagacai.

¹³Bíemona ¿nie izói coméciidiomoi? conímamo omoi daini. Ringo ifoci íbáiñeno Juzíñamuimo úriadi, meita figura, nibai figóñede. Mai daini. ¹⁴Nanómona omoi izóidino griego imaci onóigaza: íima ífótiirena baiñede; meaire cíoideza. ¹⁵Daje izói afe abina cai onónafue jiáifuena dáanomo cai llote. Ringo ífótiirena ñue baite, mei áfedo aféngomo ñúefue nítaitiaíoi. Jaca afe ringo ifoci íbáíllena, ie ífótií áretiina comuítaga. ¹⁶Mei dáamie bizóidífue júfidoacaniadi, bie cue llógamo mai cacai, mei Cristo orécamaci cue díga jiáífoídífueña náfueñedícai. Daje izói Juzíñamuimo ínotino bifue baimo jiáífo maméñediaíoi.

Cai Ocuíraimamo cai uibíñoga güilla rafue jiáímaci bácaca

¹⁷Bie izói cue dáinado ómoimo ñúefuena nítañeítícue, mei omoi gairíllafuiaímo ñue íñeno, conímama fienu finódiomoi. ¹⁸Fueñe bifue llóitícue. Dámierie omoi illáfueña cue fídítatiaíoi. Juzíñamui cáimacaíllena omoi gairilla llezica, jiáímana énenoruidíomoi, daídíaíoi. Afémaci cuemo llógana jabo ínotícue. ¹⁹Afe eneno bozíetaíllafue comuífíredeza, nibézie Crístomo nahí ínotinona, nibézie ínoñedinona jino uáfodo daííllena. ²⁰Conímama omoi énenoruillamona, bie izói zúide. Gairíllano omoi güíllafue omoi bácacaza, ja birui áfena cai

Ocuíraima íeñede. ²¹Mei güizájillamo dúcina llezica, illa dígamié dama ie atica güille güizájillena járitaifirede. Iemo dáarie jufíruilla llezica, jáíamaci jífáizabitiaioi. ²²¿Meita birui omoi jofónidiomoi, afénomo güitá omoi jiróllena? Bie izói omoi íllado Juzíñamuimo nahí ínotinona jámairuitiomoi. Afe dáaruido güíllenidinona meáruitadiomoi. ¿Mei nie izói ómoína dáaiticue? ¿Mei ómoimo ñúefuena nitáredicue? ¡Aferi ómoimo ñúefuena nitánidicue!

Cai Ocuíraima íraicaiño güíllamo cai uíbicaillafue

(Mt 26.26-29; Mr 14.22-25; Lc 22.14-20)

²³Uáfueza, cai Ocuíraimamo cai uibíñoga güíllafue fiéni omoi fínuamona, ómoimo ñúefue nitánidicue. Mei nauí ómoína cue daina izói, bie omoi cue llófuiafuena dama cai Ocuíraima llotátacueza. Afefue be ñíie: Cai Ocuíraima Jesús afe ie Judas fécaja naio, pan llíinote. ²⁴Llíinuano Juzíñamuina: “Tere figora” daide. Daina méifodo fécano daide: “Mai omoi güi. Bie cue abi; omoi ñue íllena dítaica izói ómoimo cue fecácaza. Bífuedo cuemo omoi uíbicaifireiri,” daide. ²⁵Daje izói íaioi güilla méifomo, jiróracuri llíinota daide: “Afe bie jiróracuri eromo ite iji, ómoimo cue comúitalle cómofuena ómoína onótate. Afe bie Juzíñamuimo dájena omoi jaináitalle cómofuena cue díe uáfueña íficaitate. Díga ícaíño bie íjimona omoi jiróadi áfejído cuemo omoi uíbicaifireiri,” daide. ²⁶Nana bífuiaí jira, Jesucristo nai meine ana biñena llezica, nágaruillaí bie pan omoi güíadi, íemo bie jiróracuri ero iji omoi jiróadi, áfedo Jesús cai ícoínia tíillana jino uáfodo llóitiomoi.

Afe bie cai Ocuíraimamo cai uíbicaillafue

jaca ñue coméciillamona finórede

²⁷Mei jira, nie come bie paana Juzíñamuimo ñúefuena nitáñeno güíadi, daje izói afe jirócaji afémie fiéni jiróadi, afémie cai Ocuíraima abi naa ie díe díga fiéni finode. ²⁸Ie jira, illa dígamié nai afe pan güíñena llezica ie ífoci úrillana ñue onórede; daje izói áfeji ie jiróacana llezica áfena onórede. ²⁹Mei onóigaza afe pan Cristo abína caina onótate. Dáamie aféfuena ñue náfueñeno ebena güíadi, afe daí íe güíllamona dama Juzíñamui íena duere fínoite. Daje izói dama Juzíñamui ie duere finóllíji jírúa izoide. ³⁰Daí omoi íllamona ómoimona aillo irárediaioi. Jáíe comíni náinidiaioi. Iemo daje izói dáarie tíidiaioi. ³¹Mei jáíifodo daní cai ífoci úrillana ñue cai náfueia Juzíñamui caímo riire jícanoñeite. ³²Mei íadi cai Ocuíraima riire caímo jícanoíadi, afe jícanuado afémie izire caina lletade bíniemo ite Juzíñamuimo íñoñedíno díga cai duere fínobiñeillena.

³³Mei cue ámatiaí, bie izóideza: Comunióñ güitállena omoi gairíadi, dámie raire güíñeno dájena omoi güitálleza conima omoi úiñori.

³⁴Dámie ie jufíruiadi dama ie jofomo güüzájirede, fieni omoi gairílledo Juzíñamui duere omoi fínoiza daii. Ico omoi cue eróizaille llezica, omoi jicaca jíáifuiai jáicina jóoneiticue.

**Juzíñamui Ñuera Joreño illa dígamie Juzíñamuimo
cai táijjinana fibíllena caimo fecade**

12 ¹Amatai, Juzíñamui Ñuera Joreño illa dígamiemo fecaca Juzíñamuimo táijjinana fibíllena ómoina fidítaacadie.

²Ñue onódiomoiza, nai Juzíñamuina omoi onóñena llezica, úrinide jánarai anamo íllena cuinada zonóicaigaomoi. ³Iemona: “Bífuena omoi onoiri,” daidie. Jesuna faidódímie jaca Juzíñamui Ñuera Joreñodo úrinide. Daje izói Juzíñamui Ñuera Joreñodo úriñedímie jaca uáfueña, “Cue Ocuíraima Jesús” daiínide.

⁴Illa dígamiemo afe fecaca jíáiforie Juzíñamuimo táijjinana fibíllena ite. Mei íadi aféfuiai daade Juzíñamui Ñuera Joreño fecácaza. ⁵Illa dígamie jíáiforie conímana canóredicai, Juzíñamui ocuícamacina cai íllena. Mei íadi daade cai Ocuíraima anamo iticai, ie cai íóbitallena. ⁶Illa dígamiemo cai illafue ñue jáicina jóoillena, Juzíñamui díga jíáiforie caina ocuíoide. Mei íadi daade Juzíñamui nana comínina ocuíoide. ⁷Juzíñamui Ñuera Joreño caido jáicanana cai ónoillena facáfírena raana illa dígamiemo Juzíñamui fecade, nana jíáimaci cai canóllena. ⁸Ie jira Juzíñamui Ñuera Joreño dáamie iere baitádimiena jáillena íena fibítate, jíáimaci llófuellena. Iemo jíáimiena daje Ñuera Joreño nimáiraíma úrifírena izói úrillena íena fibítate. ⁹Iemo jíáimaci afe daade Ñuera Joreñodo jamánomo Juzíñamuimo ínotagaiaioi, áfede jíáie Juzíñamuimo ínotino ñue canóllena. Ie mei jíáimaci íraredino jíllotaraimana fibítagaiaioi. ¹⁰Iemo dáarie uaido dáinamona comuide raa fínuana fibítagaiaioi. Iemo jíáinona Juzíñamui daina uai uáfodo jino llóllena fibítagaiaioi. Iemo jíáimacina nie ua Ñuera Joreñodo úrillana daje izói nie taino jóriaído úrillana onóillena Juzíñamui fibítate. Iemo jíáimacina nai llófueñega jíáiforiede uáillaído úrillana onóillena fibítagaiaioi. Iemo nai jíáimaci afe daina uailai ñue jino dobáiñuana onóillena fibítagaiaioi. ¹¹Mei íadi nana bífuiai daade Juzíñamui Ñuera Joreño fecaca. Ua dama ie óiacana izói, illa dígamiemo jíáiforiede fibíllafuiaiina fecade.

Nana cai bie dáamie abimo dúidicai

¹²Bífuiai nana bie izói jóide, mei Cristo íemo ínotino díga, daade abi izóideza. Afe daade abimo jaináidinuiaina aillo ite. Mei aillo ite íadi, nai afe abi daade. ¹³Afe izói aillo jíáifoidinona cai íllamona, níbai judíodicai, níbai griégodicai afe jaca mámeñega. Mei daade Ñuera Joreñodo nana cai daade abina jaináitagacaiza. Daje izói níbai rairuícanodicai, níbai ráiruíneganodicai daje abina iticai. Ua daade Juzíñamui Ñuera Joreño daade abina finócacai. Afe daade Juzíñamui Ñuera Joreño úicaitagacai.

14 Cai abi daje izóiñede, mei diga ráaniai daade abimo jaináinaza. 15 Mei jii, come eiba: “Cue bie ónoñedicueza daje abí iñedicue,” daiñadi, daií dáinado daje abimo ie jaináinana uáitanide. 16 Daje izói come jefo: “Cue bie uñiñedicueza daje abí iñedicue” daiñadi, daií dáinado daje abimo ie jaináinana uáitanide. 17 Mei cai abi nabáinino daa uñji íadi ñnie izói cácaiticaí? Daje izói cai abi nabáinino daa jefo íadi ñnie izói jálliana cácaiticaí? 18 Mei íadi nana cai abimo jaináidinuiaina, afe abimo ñue baitínuiaimo, Juzíñamui ie comeci jítaina izói jóonete. 19 Nana cai abi dáadeniadi afe nabáíñiai illino iñede. Ua abi iñede. 20 Mei íadi ja onódiomoiza, dáamiemo jaináidinuiaina aillo ite, íadi jaca ie abi daade.

21 Daje izói nane jiáífue, cai ui ónoina: “Ona jitáíñedicue” daiñide. Daje izói ifoci efbana: “Ona jitáíñedicue” daiñide. 22 Mei jiáífodo cai abimo ite mairíñedino iere jamánomo jitáirede. 23 Daje izói cai abimo ite figo coméciñegano áfena iere ñue uññoticaí. Iemo cai abimo jino uáfodo cótanidinona, áfena iníroido ebire finode. 24 Mei íadi cai abímona uáfóri cfoidino cótanidino izói ebire finónidiaioi. Bie izói Juzíñamui cai abimo itíñuiaina dájemo jofo ñue zorode, cai figo coméciñeganomo ñúefuena jamánomo cai nitállena. 25 Juzíñamui daií zorode, cai abimo itíñuiái conímana énenoruiñeillena. Mei íadi jiáífodo illa dígano conímamo comeci úfede. 26 Come abimo itíñuiaimona daano izi cácana llezica, nana jiáíñuiái daje izói duere zéfuitiaioi. Daje izói dáanomo ñúefue nítano caimare íadi, nana jiáíñuiái dájena caimare itíaiói.

27 Mei jira bie izói nana omoi Cristo abídiomoi. Omoimona illa dígamiaí daa ie abimo itíñuiái izóidiomoi. 28 Afe jira Juzíñamui jiáífodo tájijnana dáarie íemo ínotinomo jóonete. Nano fueñe Cristo orécamaci jóonete. (Afémaci jiáífo mameina ie apóstoles.) Afe mei jiáínona Juzíñamuimona ogáfuiaí uáfodo jino llotino jóonete. Afe mei nane jiáínona ie uai llófueraíni jóonete. Iemo uaido dáinamona raana comútatino jóonete. Iemo iráredino jllotaitino jóonete. Iemo jiáímacina canófiredino jóonete. Iemo jiáímacina ocuífiretino jóonete. Iemo nai llófueñega jiáízie uáillaído úritino jóonete. 29 ¿Meita cai nana Cristo orécanodicaí? Ieñedicaí. ¿Meita nana cai bie Juzíñamuimona ogáfuiaí uáfodo jino llotínodicaí? Ieñede. ¿Meita nana cai ie uaina llófuetínodicaí? Ieñede. ¿Meita nana cai bie uaido raana finódinodicaí? Ieñede. 30 ¿Meita cai bie iráredinona jllotaredicaí? Jllotanidicaí. ¿Meita cai bie nana nai llófueñega jiáízie uáillaído úritínodicaí? Ieñedicaí. ¿Meita cai bie nana aféuai dobáíñuano jino uáfodo llóredicaí? Jaca nana llónidicaí. Dámierie dobáíñorediaioi. 31 Mei ie jira, nana bie fibíllafuiaimona baímo ñuera fibíllafuiaína Juzíñamuimona omoi óllena afe omoi nícidori. Mei íadi afe fibíllafuiaí baímo, jiáíe ñúefuena ómoimo llófueitícue.

Jiáimana cai izíruillafue

13 1 Mei uáfueza, nai llófueñega jiáízie uáillaído úrillana cue fibíadi, íemo afe baímo Juzíñamui abi imaci úrilla izói úrillana

daje izói fibídicue ia, mei íadi jiáimana cue íziruiñeniadi, fia taino ficírede juai izóidicue. Iemo jiáie taia ficírede lloéturu izóidicue. ²Daje izói Juzíñamuimona ogáfuiái jino llúana cue fibíadi, íemo nana nai uáfodo onónegafuiái llúana cue fibíadi, íemo jamánomo nimáiraimana cue jáiadi, íemo idu jáinua Juzíñamuimo íinogafue cuemo íadi, mei íadi jáimana cue íziruiñenia, táinomo fáifíticue. ³Daje izói, nana cuemo ite ráaniai jiáimaci canóllena fia cue fecáadi, íemo Juzíñamui íóbitallena dama cue abi cue jobáitaiadi, mei íadi afe llezica jiáimana cue íziruiñenia, nana cue finócafuiái cuemo ráifíñede.

⁴Mei jiáifodo, jiáimana izíruiñenie jaca járitaiñede. Afémie dúecaifirede. Daje izói úradoifinide, íemo afémie ucofíñede, íemo fieni abí íinoñede. ⁵Daje afe jiáimana izíruiñenimie meáiredifuenta jaca lloñede, íemo afémie ie abina jacire maméñede, íemo afémie jaca rícaifinide. Jiáima fiénidifue íemo finóadi, fieni comécíñeno raire féitate. ⁶Afe jiáimana izíruiñimie jiáimaci fiénidifuiái fínuari zúureite, mei jiáifodo ua núefueri íóbifirede. ⁷Nana íemo comúdifuiáiri caimare ocuide. Raire járitaiñeno aféfuiaimo ñue úíñoode. Juzíñamuimo izire fínuano aféfuiairi jacínaiñeno ñue ocufíride.

⁸Izíruillafue zíñona jaca záíñeite. Mei íadi Juzíñamuimona ufcodo onoiga ráfuiaí záite. Daje izói jiáimaci uáillaído úrilla llícaite; íemo daje izói ífócido onóigafuiái záite. ⁹Mei biruíllaído cai ífócido onóigafuiái ñue ícoimo baitáñedicaiza, jabo onódicaí. Daje izói Juzíñamui ufcodo onoiga ráfuiaimona due jino lloticaí, mei due onódicaiza. ¹⁰Mei íadi uire Juzíñamui nana ráfuiaí caimo baitálliruimo afe ícoimo ñue báitañegafuiái fáicanocaille.

¹¹Nai cue úruena llezica úruiaimo itífuiaído úriticue. Urue comeci fácaja izói, comeci facádicue, íemo úrue ífoci úrilla izói iticue. Mei íadi ja cue móonaila llezica, úrue illa izói cue illáfuiaina fáicanocaidicue. ¹²Daje izói birui Juzíñamui dibénemo cai onóigafuiái jaicuíbicaide. Dámie jáiaira acáranimo figo cíoiñena izói afe izói Juzíñamui ífuiaina birui figo baitáñedicaí. Mei íadi ico jiáíruido nana ñue báitaiticaí. Birui cue ífoci úrilla figo déíñedeza, jabo onódicue, mei íadi aféruido nana ñue ónoiticue. Jií, Juzíñamui cuena onona izoi ñue jaícina ónoiticue. ¹³Mei daí Juzíñamuimo íinogafue, íemo jiái ocufírinafue, íemo jiái izíruiñafue jaca zíñona féíñeite. Bie daámanidemona izíruiñafue iere jamánomoide.

14 ¹Mei ie jira, afe izíruiñafue iere jeire omoi oiri. Afe ua llezica Juzíñamui Ñuera Joreño fecaca jiáíforie tájijnana fibíllena izire omoi jenori. Omoi jenolle llezica, Juzíñamuimona onoiga uai jino llua baímo izire jicari. ²Mei íadi dámie nai llófueñega jiáizie uaido úriadi, dama Juzíñamuimo úrite. Comínimo úriñede; mei afémie úrillana buna canóñenaza. Afe ónoñega uaido úritimie Ñuera Joreñodo úrite, mei íadi afémie daina uai uáfodo onóñena báinino jóoide. ³Mei jiáifodo

afe Juzíñamuimona onoiga uai llotímie, comínimo úrite íaioi joreño dibéfuemo íaioi ñue móonaitallena; daje izói ñue íaioi náirellena, íemo jíái íaioi caimare fírallena. ⁴Afe jíáizie uaido úritimie dama ie joreño dibéfuemo móonaite; mei íadi afe Juzíñamuimona onoiga uai llotímie, Juzíñamuimo jaináidinona ñue móonaitaite.

⁵Afe nai llófueñega jíáizie uaido úrillana nana ómoiena jitáidicue. Mei íadi Juzíñamuimona onoiga uai jino omoi llóllena iere baimo jitáidicue, mei afe onoiga uai jino llua, jíáizie uaido úrilla baimo ráifide, Jesucrístomo íinotino aillo móonaitallena. Mei íadi afe jíáifoide uaido úritimie úrilla dobáñoraíma íadi, afefue ñuera; mei áfedo nana Juzíñamuimo jaináidino dani íaioi joreño dibéfuemo daje izói ñue móonaitaíaoiza. ⁶Ie jira ámatiai cácarei. Uire omoi cue uáiduaíbia omoi cígiri Ñuera Joreño úritate jíáizie uaido cue úriadi, cue úrilla ómoímo due jiza ráifíñede. Mei jíáífodo Juzíñamui caímo onótagafuíaído cue úriadi afefue ómoímo ráifide. Daje izói omoi ífoci ua uaina cue déitaiadi afefue ráifide. Iemo daje izói Juzíñamuimona onoiga uai ómoímo jino cue lloia afefue jíái ráifide. Daje izói omoi cue llófuia ráifide.

⁷Mai nana omoi rúado taiga raamo ñue comécíiri, áfemona ñue onóillena. Afe raa jaca comécínideza. Be totf bacui, íemo arpa, íemo juai díga caimare ficire úrite, mei íadi jíáíma fieni taia, áfena cacáidino afe úrilla uaina ónoñeítiaíoi. ⁸Daje izói comíni jobáiriacana llezica, uáidua juai táíñeniadi comíni figo áfemo mámeriñeítiaíoi. ⁹Afe izói ómoímo íficaide: dáamie jíáifoide ónonide uaido omoi llófueia ie dáinana bu onóñena. Afémie táinomo úrite. ¹⁰Uáfodo onóigaza; bie éniemo díga jíáie nairai uallai ite. Afe uáillaina onódinomo nana aféuallai ñue baite. ¹¹Mei íadi cuemo úritimie uaina cue ónoñenia, afémiemona jíacánemiedicue. Daje izói afémie cúemona jíacánemie. ¹²Ie jira, afe Ñuera Joréñomona fecaca táíjínana fibíllena omoi iere gaina llezica, mai Juzíñamuimo jaináidinona ñue móonaitallífuiaína iere izire omoi jíicari.

¹³Afe jira nai llófueñega jíáizie uaido úritimie afe ie daina uaina ñue jino llúana fibíllena Juzíñamuimo jíárede. ¹⁴Mei jíáizie uaido Juzíñamuimo cue úriadi, ua cue joréñodo úriticue, mei íadi cue ífoci úrilla, táíjíneno oni eneno ite izoide. ¹⁵Mei íemona çñifue fínoíticue? Cue joréñodo naa cue ífoci úrillado Juzíñamuimo úriredicue. Daje izói cue joréñodo naa cue ífoci úrillado afémiemo róredicue. ¹⁶Mei jíi, dama o joréñodo Juzíñamuimo o úriadi o áinori ite, áfemo fibítañega cacáreídímie, Juzíñamuina figora o daiífirenafue dibénemo ínide. Mei o dáinana onóñedeza. ¹⁷Mei níbai Juzíñamuina figora o daiífirena Juzíñamuimo ñue cacaide, íadi jíáímana dama ie joreño dibénedo ñue móonaitañede. ¹⁸Nana omoi baimo jíáizie uaido úriredicue. Aferi iere Juzíñamuina figora daidicue. ¹⁹Mei íadi Juzíñamuimo jaináidino gairífirena llezica, ónoñega jíáífodo jóide uallai baimo, jubeba díga ñue

onoiga uai cue dáinana gáidicue, jiáimaci cue llófuellena. Mei íadi diez mil féirede jiáizie uai afémaci cígimo cue úrillana gáíñedicue.

²⁰ Amatai, úruiai comeci faca izói, afe izói comeci omoi facáñeno iri. Mei jiáífodo éicomini izói comeci omoi facari. Mei íadi fiénidifue dibénemo jézainidino izói omoi iri. ²¹ Jaii cai ocuilla uai ciegánicomo Juzíñamui íemo cacáacañede Israel náiraina bie izói daide:

—Bie náiraina jiáie uáillaido úritinodo duere fñoiticue;
oníñemacido íaioi llétaiticue.

Mei íadi afe bie uaido nai cuena náfueñeitiao.

Daí cai Ocuíraima daide, —aquíe izói ie uai llote.

²² Mei daí afe jiáizie uaido úrillana fibíllafue Juzíñamuimo fñoñedinomo dúide, jiáie onótate raa izói íaioina onótallena. fñotinomo dúíñede. Mei íadi Juzíñamuimona onoiga uai jino llúana fibíllena Juzíñamuimo fñotinomo dúide, jiáie onótate raa izói íaioina onótallena.

²³ Mei jira nana Juzíñamuimo jaináidino dánomo gairilla llezica, íemo nana omoi jiáizie uaido omoi úriadi ie mei áfemo fñbitañega fñoñedino omoi cígimo bíadi, nibai “Uáiritaidino izóidiomoi,” dáitiao.

²⁴ Mei jiáífodo Juzíñamuimona onoiga uai jino omoi llua llezica, íemo fñbitañega fñoñedimie omoi cígimo bíadi, ie comécimo ite fiénidifueña uáfodo ónoite. Nana omoi dáinana cacáillano afémie dama ie comécina méiñotaite. ²⁵ Afe daí dama ie comeci onóigafuiai jino cfocaillamona, cañcido ana dújullano Juzíñamuina cáimadoite. Iemona: “Uáfueña, Juzíñamui omoi cígiri íteza” dáite.

Omoi gairilla llezica nana omo llollífuiai jaicuñeno jaícina lloiri

²⁶ Mei jira, ámatiai, omoi gairíllífuiai bie izói írede: Omoi gairilla llezica ómoimona dáarie Juzíñamuimo rollírua jino llóiacade. Iemo jiáimie llófueacade, íemo jiáimie Juzíñamui íena onótagafue jino llóiacade, íemo jiáimie jiáífoide uaido úriacade, íemo jiáimie afe jiáizie uaido úrilla jino dobáiñoiacade. Nana bífuiai ñuera. Mai bífuiai daí íteza, Juzíñamuimo jaináidino ñue móonaillena, daje izói íemo nai fñoñedino fñotallena. ²⁷ Jiáizie uaido omoi úriadi mena come dáaruido úrinide. Jiáimie úrilla llícailla méifomo úriri. Daámani come daí úrerede. Naga come jiáífoide uaido úrilla fuíllamo ie lloga uai dobáiñorede. ²⁸ Mei íadi uai dobáiñoitimie fñeniadi, mai nie izói jiáífoide uaido daíñeno iri. Dámie úriacania dama ie comécido Juzíñamuimo úriri. ²⁹ Daje izói afe Juzíñamuimona onoiga uai llotínomona damieámani úrerede, íadi daje llezica úrinidiaioi. Llotímie fuilla méifomo íemo cacáreidino fairórediaioi, ie dáinana ja Ñuera Joréñomona comuide, nibai íeñede daíllena. ³⁰ Mei íadi dámie uai jino llua llezica, Juzíñamui jiáie ana ráiidimie omoi jiáífue íena onótaiadi afémie raire fueñe úritarede. Nano fueñe úritimie ie úrillana fáicanocairede. ³¹ Afe daí nana omoi

Juzíñamuimona onoiga uai llotino llórediaioi. Uafue dámierie jino llórediaioi, áfedo nana omoi onóicaillena; daje izói áfedo nana omoi começi náirecaillena. ³²Nana afe Juzíñamuimona onoiga uai llotino dani íaioi joréñona rairuírediaioi, nai jiáimie úrilla fuiñena dino. ³³Mei Juzíñamui caimare uái illifue comuítatimie; íemo, úrillana féitate gáguana afémie comuítañede.

Nana jiáinomo ite Juzíñamuimo jainaide gairídino fñua izói birui ómoína finótaiticue. ³⁴Juzíñamui ióbillena omoi gairilla llezica, cígimo ite ringóniai úrilla rairuírede, íñiaina ie llófuellena. Juzíñamui ocuilla uai daina izói, aféngotiai iima anamo caimare írediaioi. ³⁵Aféngotiai daa rafue onóacania, jino jofomo íaioi inimo jicánorede. Daa ringo comini gairilla cígiri úria meaire cioide.

³⁶Mai cácarei, ¿Meita Juzíñamui uai dani ómoimona comuide, daí começi facádiomoi? ¡Daifñede! Daje izói aféuaina dani ómoimo llógaza comécíñeno iri; mei diga jiáimaci íena, daje uaina jae llogáiaioiza. ³⁷Daa come Juzíñamuimona onoiga uai jino llotímedicue daífadi, bie ómoimo cue cuezáfuiái cai Ocuíraima Jesucristo cai ocuilla uai afémie daífrede. Daje izói daa come Ñuera Joréñodo úritimedicue daífadi, afémie cue cuela dibénemo Jesucristodo cai ocuilla uai daífrede. ³⁸Iemo afe cuezgana ailli cue daina bie izói daífacañedimie omoi náfueñeno iri.

³⁹Cue ámatiai, bíemona Juzíñamuimona onoiga uai jino llua jeire omoi oiri. Iemo da come jiáizie uaido úria, rairuíñeno iri. ⁴⁰Mei íadi afe llezica, omoi llolluina jaicuñeno daje fuémoma jiáimamo meaire cíotañeno lloiri. Daje izói nana omoi jetaca raana jaicuñeno ñue jaícina maméfireiri.

Jesucristo tiilla meine abido cáadimie illafue

15 ¹Cue ámatiai, ómoimo cue lloga jíllona uai ómoína uibíñotaacadícue. Afe uaina jae jeire otíomoi. Iemo bie uaido ñue itíomoi. ²Daje izói cue lloga uai omoi náfueia bie Juzíñamui uai omoi úado jíllotagaomoi. Mei íadi nauí ñibai táinona omoi íinoia jae jílloneñomoi.

³Cue onoiga jamánomoidífue nauí ómoimo llotícue. Juzíñamui Cuezáuai daina izói, Cristo cai fiénidífuiái muiñóllena tíillafuena jae omoi llófueticue. ⁴Iemo nane afe Cuezáuai daina izói, Cristo raiga daruíamani íllamona meine abido cáadimiéna jáillana ómoína llófueticue. ⁵Iemo afe Cristo Pédro mo cíocaide; afe mei nana jiáie ie orécamacimo cíocaide. ⁶Nane afe mei dáaruido quinientos baímo íemo ínotinomo cíocaide. Afémacimona aillo nai itíaiói, íadi dáarie jae tíidiaioi. ⁷Nane afe mei Santiagomo cíocaide, íemo nane nana ie orécamacimo cíocaide.

⁸Nana jiáimacimo cíocailla mei, íirainomo afémie cuemo cíocaide. Iemona úrue jiáifodo jocoina izóidimedicue, mei Crístomo cue

dóbaicallafue jarire cuemo íficaideza. ⁹Mei Jesús orécamacimona jofófenemo ráifidimedicue. Juzíñamuimo jaináidino fállena cue racáfirenamona, nauí ie orécamie cuena daiínide. ¹⁰Mei íadi Juzíñamui ñue cuemo íllado, bie izóí iticue. Afémie cuemo dúecaillano afémie cue cánuana táinomo fáifitañedicue. Mei jíáífodo jíáie ie orécamaci baimo, iere riire táijidicue. Mei íadi afe izóí dama táijinidicue. Juzíñamui cuemo dúecaillano cue diga jáicaillado daií táijiredicue. ¹¹Mei birui, afe ñúefue nibai cue lloga, nibai afémaci lloga, afe llúáfueña náfueñedicue. Mei íadi bie ñúefue ja ómoimo cai llogafue, daje izóí afefue omoi ínogafue.

¹²Mei bie ómoimo cai llogafue Cristo tíllamona meine abido cáadimierna jailla. Afe llogafue bie izóí ítena, ¿mei nie izóí ómoimona dáarie: “Tíidinomona buna meine abido cáadinona íñeite,” daidíaiói? ¹³Meita íaiói daina izóí tíidinomona buna cáañenaza, daje izóí meita dama Cristo cáañeite. ¹⁴Iemo meita Cristo cáañedeza cai llócaiga uai ráifíñede. Daje izóí omoi ínogafue ráifíñede. ¹⁵Iemo afe baimo, cai bie Juzíñamui dibénemo taino llotíñodicaí, mei Juzíñamui Cristo meine abido cáatate daidícaiza. Meita tíidino meine cáañenaza, daje izóí Juzíñamui Cristo meine cáatañeite. ¹⁶Mei tíidino meine abido cáañeniadí, meita afe Cristo cáañeite. ¹⁷Iemo meita Cristo cáañedeza, omoi ínogafue ómoína ñue finóñede. Nai ómoimo ite fíenidífuiaímo nai jaináicaidiomoi. ¹⁸Meita íaiói daina izóí Cristo cáañedeza, Crístromo ínote tíidino táinomo fáifidiaíói. ¹⁹Meita Crístromo cai ocuírínafue daa biruíllaído bíniemo cai illa llezica caimo dúideza, nana comini baimo cai duere finócanodicaí.

²⁰Mei íadi afe izóíñede. Cristo tíllanomona meine abido cáadimierna jailla ñue onóigaza. Amena llizíllajimona jotáiritíjii fueñe uailla izóí, Cristo nana tíidinomona meine abido caadino ífódimie. ²¹Mei bie izóí daa cómemona, Adán dainámiemona tíllafue fueñe bíniemo comuídeza; daje izóí tíidino meine abido cáailífue daa cómemona comuide. Afémie Jesucristo. ²²Afemona nana comini Adamo jaináideza, tíítiaíói; íemo daje izóí nana Crístromo jaináidino meine abido cáaitiaíói. ²³Mei íadi nana nairai daje llezica meine abido cáañeítiaíói. Nágamíiaí íaíoiimo dúide dieze, íaíói cáatalliruido cáaitiaíói: raíre úcodo oga llizíllajii óina izóí, Cristo fueñe meine abido cáadimierna jaide; afe mei Cristo billíruimo dama Cristo iédino cáaitiaíói. ²⁴Iemo íirairuimo dúciite. Aféruimo Cristo nana bíniemo ite rírede illaini naa monamo ite ríñoredinuiáiri niné táinocaitaite. Afe mei nana ie illáimana illa ríino naa ie anamo itíñuiairi ie Moo Juzíñamuimo fécaite. ²⁵Mei jíi, Cristo nai illáimana írede, Juzíñamui nana íena éoidino Cristo anamo itábicaítalle dino. ²⁶Come tíllafue caina anáfenoacade caina éoidimie izoide. Mei íadi afe cai titade ríinona Cristo íirainomo niné táinocaitaite. Afe mei jíáie táinocaitallimierna íñeite. ²⁷Mei Juzíñamui nágaíuíaína Cristo

anamo jóonete. Cristo ñue afémaci ocuállena. Juzíñamui Cuegáuai bie izói daiíadi, Juzíñamui Cristo anamo iñénana uáfodo onóigaza, mei Juzíñamui naga raa Cristo anamo jóonetimieza. ²⁸Iemo nágafuiai Cristo anamo itábicailliruimo, dama afe Cristo Juzíñamui Jitoza ie Moo anamo itábicaiteza. Juzíñamui nágafuiai Cristo anamo itábicaítimie. Aféruimo bífuiuido naga ráaniai dibénemo Juzíñamui jamánomoidimiena íite. Naga ráfuiui naa ie comútaga ráaniairi ñue jaícina afémiemo dúite.

²⁹Nane jiáifue “Tíidinona meine cáañeite” daiífiredinona dáititue. Dáarie tíidino dibénedo báutizatitino ite. Meita tíidino meine cáañeitiaioiza, ¿nibái mei daií báutizatitiaioi? Iemo tíidino dibénedo báutizafue ¿minícamo ráifide?

³⁰Iemo cue, cue nabáñiaí dígá, Juzíñamui ñúefue ícoínia, nágaruillaido iere caina titáacade jácifuemo ífiredicái. Meita tíidino meine abido cáañeiteza, daií cai íadi ¿minica caímo ráifilla? ³¹Nágarui cue titállena mamédiaioiza jácinomo iticue. Uáfueña daií iticue. Cue ámatiaí, cai Ocuíraíma Jesucrístomo omoi ínuari uáfueña iere íobidicue. Afe uáfueña cue íóbilla izói, daje izói uáfueña nágarui titáacagacue. Iemona tíidino meine abido caalle uáfodo onóigaza. ³²Iemo meita tíidino meine cáañeiteza, jamái cómena cue illa, Efésomo ite illáirede rille izóidimaci díga nauí cue fuíríllamona ¿minica cuemo ráifilla? Mei afe izói cue illa cuemo ráifíñede. Meita uáfueña tíidino meine cáañeiteza, afe taino llotino ñue jaícina daidíai. Afémaci daína bie izói jóide: “Mai raire cai güilli, güillano cai jirolli; mei úreitiruiemo raire títicaíza afe mei nine íñeíticái,” daidíai.

³³Jiáimamo omoi jífuefíñeno iri. Abina ñue onona uai uáfodo jóideza: “Fíénide nabáñiaí ñue illáfuiaina niné táinocaitate.” ³⁴Mei jiáifodo, ñue abina omoi onoiri. Omoi illafue ñue jaícina jóoneri. Fíénidífueña finóñeno iri. Mei ómoimona dáarie Juzíñamui nai figo onóñedeza. Omoi méaicaillena bie izói ómoína daidicue.

Tíidino meine abido cáadinona íllena abi Pablo lloté

³⁵Nibai birui ja dáarie jicánoite: ¿Mei nie izói tíidino cáaitiaioi? ¿Mei afémaci abi nie izói éroite? ³⁶Afe izói jicánua abina onóñedimie úrilla izoide. Mei daa ríffregaji cai ríadi, afeji tíide izói énie anamo fiébirede, áfemona ie iroci zicóllena. ³⁷Eniemo riga raa, afénomona zicódirociñede, mei jiáifodo dama ie íji ríina. Iemo díga jiáiforiede íjiaí ríina: bellaji ríina, íemo mazácaji ríina, íemo arroz íji daje izói ríina. ³⁸Afe ríinaji zícua llezica ie ciona izói Juzíñamui comúitate. Dani aféjiaí dúina izói zicótate. (Bellájimona bellari zócaja, íemo mazácajimona mazácari zócaja.) ³⁹Mei afe izói naga cáadinuiaí abi jiáiforie eroide. Come abi jiáifoide, íemo rille abi jiáifoide. Daje izói féedino abi jiáifoide, íemo chámuniaí abi jiáifoide. Nana daje izói eróíñede. ⁴⁰Iemo jiái monamo ille abi ite, íemo jiái éniemo

illa abi ite. Bíníemo illa abi ebírede, mei íadi monamo ille abi ebire eroina jíáifoide. ⁴¹Jitoma egáíñua fiui egáíñuana eróíñede; jíáifodo egáíñote. Daje izói ucudu egáíñua izóíñeno, jitoma jíáifodo egáíñote. Iemo jíái daa ucudu jíáie ucúdu mona egáíñua jíáifodo cíoide. ⁴²Tíidino meine cáailífue bie izói jóide. Rífaite feizi éniemo raiga, íemo tíñeítinona meine abido cáaite. ⁴³Jámairuiga abi éniemo raiga, ie mei ebire cíoitaga abi meine cáaite. Daje izói nane ríñide abi éniemo raiga ie mei ñue íocirede abi cáaite. ⁴⁴Bíníemo cai jocoina abi éniemo raiga, ie mei mona díbénemo dúide abi cáaite.

⁴⁵Mei daí Juzíñamui Cuegáuai llote: “Nanáidímie Adana cáadímiena ífícaide. Iiraie Adán daina Cristo zíñona cáatata joréñoredímie,” daide. ⁴⁶Juzíñamui díbénemo cai comútatímie nano fueñe cómuítanega, mei jíáifodo bíníemo cai nanóidímie Adán fueñe comútaina. Afe méífoimo Juzíñamui díbénemo cai comútatímie cíocaide. ⁴⁷Nanáidímie énie ie finóinaza éniemo dúide. Méífoide Adán daina Cristo mona ie. Afémie cai Ocuíraima. ⁴⁸Afe énie finóinámie izói, nana bínie comini ie abi izóidiaioi. Daje izói Jesumo ínuamona monamo dúídino afe monámona bitímie izóidiaioi. ⁴⁹Iemona énie ie finócamierna cai eroina izói, afe izói mona ímiena éroíticai.

⁵⁰Amatíai, omoi cacai, ómoína dáíitícue, nana bínie dúide cai abi díe díga jaca Juzíñamui illáimana illánomo jofo jáinide. Daje izói raire táinocaitítí fue zíñona illánomo dúíñede. ⁵¹Mei íadi nanómoma uáfodo onóñega ráfuena ómoína onótaacadícue: nana tíñeíticai; mei íadi nana jíáifodo méídfocaitícaí. ⁵²Uáfueña, Juzíñamui íiraie vudugoi fúunua llezica, jarire ui bótacailla izói raire jíáifodo méídfocaitícaí. Afe vudugoi ficire cáacaillamona tíidino meine abido jaca tíñeíllena cáatalliaioi. Afe llezica cáimona cáadímaci jíáifodo méídfocaitícaí abido tíñeíllena. ⁵³Mei caimo ite raire féítí fue zíñona féíñeítífueña méídfocairede. Daje izói cai tíite abi zíñona tííñede abina méídfocairede. ⁵⁴Iemo afe bie caimo ite raire féítí fue zíñona féíñeítífueña méídfocaiilla llezica Juzíñamui Cuegáuai daina ñue jáicína zúite. Daje izói cai tíite abi zíñona tííñede abina méídfocaiilla llezica afe Cuegáuai ñue jáicína zúite. Afe Cuegáuai daina bie izói jóide:

Caimo ite tíillífue,

caina éoidímie anáfenoína izói, anáfenoga; ja táinocaide.

⁵⁵Cai tíítítífue caina izi cácatafírena ríno jae íñede.

Caina nie izói nábaiñeite,

mei ie molleroi izoide raa ja birui íñédeza.

⁵⁶Nana comínimo fiénidífuiái íllamona, tíítítífue caina jacíruitade. Iemo jaiái Juzíñamui cai ocuilla uai llúamona cai fiéni finócafuiái duere finórede. Iemona tíillífue cai anáfueñuana jaca jacíruiticai. ⁵⁷Mei Juzíñamui cai Ocuíraima Jesucrístodo áfemo caina anáfenotañenamona íena iere figora daíífredicai.

⁵⁸Ie jira, cue izíruiga ámatiai o ínogafuena jíáifodo méidoñoeno ñue jeire omoi oiri. Juzíñamui ocuica táijinafuemo nágaruillai iere omoi náfuereiri. Mei ñue onódiomoiza, cai Ocuíraimamo dájena cai táijinafue, jaca táinomo fáifíñeiteza.

Dúerede cai ámatiai canóllena úcube eneno ofítafue

16 ¹Crístomo ínote ámatiai canóllena úcube omoi jicánoga eneno ofítallifue llóiticue. Galacia éniemo ite Juzínamuimo jaináidino cue llófuia izói, afe izói omoi ofítari. ²Naga semana táiniaruimo, ómoimona illa dígamie omoi oga úcubemona due jiza Juzíñamui íena oni eneno jóneri. Nano omoi llínua dieze oni eneno jóneri. Daií uícodo omoi ñue eneno énofireiri, cue billíruimo afe úcube ómoïdo cue íraíñeillena. ³Uire cue bille llezica omoi nizeda dani baillímiedo afe úcubena Jerusalémo óreiticue. Afe llezica omoi cuelle útímiiai mámece illábedo íaioina óreiticue. Afe bie izói omoi ofítaga úcubena Jerusalémo ite ámatiaimo óreiticue. ⁴Onoñegaza, cue jíruia afémaci díga dane jáiticaí.

Pablo jíáinomo jáillena mamérite

⁵Cue jáiadi Macedonia éniemo jáiacadicue. Afe méifodo daií Coríntomo dúciiticue. ⁶Mei níbai nano nié dino omoi cígiri íiticue. Níbai ónoñegaza bie rozírediruillaina omoi cígiri záitaiticue. Afe mei oni jíáinomo cue jaille llezica cuena canórediomoi. ⁷Mei ómoïmo fia jarire érocaillano jáiacañedicueza, cai Ocuíraima comeci jítaia, omoi cígiri are íacadicue. ⁸Mei íadi Pentecostés rafue dúciille dino, benó Efeso jófuemo íiticue. ⁹Mei iere ñue Juzíñamui uaimo cue táijilliruimo itícuéza. Aillo comini birui aféuaimo jíruiacadiaioi. Mei íadi afe llezica aillo afe uaina uáitatino ite.

¹⁰Timoteo ómoïmo bíadi, mai omoi cígiri caimare íena omoi itátari. Afémiena omoi áifedoñoeno iri. Mei afémie daa cai Ocuíraima ocuícamo cue izói táijideza. ¹¹Ie jira ómoimona buna afémiena jámairuñeno iri. Mei jíáifodo cue ie éroizaibilieza caimare afémiena omoi canori. Mei naa jíáie ínote ámatiaioiri íena ocuúridicue.

¹²Cai ama Apolos dibénemo llóiticue. Naui íemo izire jicádicue, jíáie ámatiaioiri omoi éroizaillena. Mei íadi afémie birui jáiacañede. Uire ie jáiacalliruimo jáite.

Iiraicaiño uáidonocaila uai

¹³Mai abina ñue omoi onoiri. Crístomo omoi ínogafue jíáifodo méidoñoeno jeire omoi oiri. Jacíruiñoeno ñue íociredímie izói omoi iri.

¹⁴Nana omoi jetáacagafuai, conímana izíruillafuedo finori.

¹⁵Amatai, birui onódiomoiza, Estéfanos mámeceiredímie comini, nano fueñe Acaya éniemo ñúfuemo dóbaicaidino. Dóbaicailano jíáie

Crístomo íinote ámatiai canóllena ja maméritiaioi. ¹⁶Jira afémaci, naa jíáie afémaci izóidinori anamo omoi caimare itábicaillena iere jitáidicue. Daje izói jíáinona canófiredino, naa jabo ocuúidinori anamo mai caimare omoi itábicairi. ¹⁷Ja Estéfanos, Fortunato, Acaico diga bíllari iere íóbidicue, mei cúemona jica itómoiza cuena canónidiomoiza. Mei íadi afémaci ómoimona féiredifue cuemo finódiaioi. ¹⁸Afémaci cue comécina iere náiretadiaioi; daje izói ómoina náiretadiaioi. Afe izoide comínimo ñue omoi jíeruiri.

¹⁹Benó Asia éniemo ite Juzíñamuimo jaináidino ómoimo uaillai orédiaioi. Daje izói Aquila ie ai Priscila diga naa íaillinoimo gairídinori, cai Ocuíraima mámeçido uai ómoimo orédiaioi. ²⁰Nana benomo ite ámatiai oreca uaillai, mai omoi llíinori. Daje izói conímana caimare uáidori.

²¹Cue Páblodicue. Dama bie cue ónoido cuela uai ómoimo orédicue.

²²Ninó dámie cai Ocuíraima Jesucrístona izíruiacañedimie Juzíñamui faidólleza. ¡Cai Ocuíraima, mai raire biri!

²³Cai Ocuíraima Jesucristo ómoina ñúefuena éziciiteza. ²⁴Nana omoi Jesucrístomo jaináinado, ómoina cue izíruiilla uai orédicue. Daiítadeza. Jae niie.